

JUDGMENT Express

[2025] 3 MLRA

Muhammad Akmal Zuhairi Azmal & Yang Lain
lwn. Pendakwa Raya & Satu Lagi Rayuan

609

MUHAMMAD AKMAL ZUHAIRI AZMAL & YANG LAIN lwn. PENDAKWA RAYA & SATU LAGI RAYUAN

Mahkamah Persekutuan, Putrajaya
Hasnah Mohammed Hashim KHM, Nordin Hassan, Abdul Karim Abdul Jalil
HHMP
[Rayuan Jenayah Nos: 05(M)-103-07-2024(W) & 05(M)-107-07-2024(W)]
28 Mac 2025

Undang-Undang Jenayah: *Kanun Keseksaan (Malaysia) — Seksyen-seksyen 302, 109 — Membunuh — Persubahatan membunuh — Rayuan terhadap sabitan — Perayu pertama hingga kelima disabitkan dengan kesalahan membunuh dan perayu keenam disabitkan dengan kesalahan bersubahat membunuh dan kesemua mereka menerima hukuman mati — Sama ada kesemua elemen kesalahan membunuh dibuktikan — Niat bersama — Pembelaan perayu-perayu — Sama ada sabitan perayu-perayu tidak dapat dipertahankan — Sama ada keterangan yang dikemukakan mencukupi untuk sabitan bagi kesalahan memamatkan orang dengan salah yang tidak terjumlah kepada kesalahan membunuh orang di bawah s 304(a) Kanun Keseksaan*

Kes ini bermula dengan kehilangan sebuah komputer riba milik perayu pertama, seorang pelajar di Universiti Pertahanan Nasional Malaysia. Mangsa (“Si Mati”), yang juga seorang pelajar di universiti yang sama, disyaki mencuri komputer riba tersebut berdasarkan ‘petunjuk’ daripada seorang pengamal perubatan Islam yang dirujuk oleh perayu pertama. Pada 21 Mei 2017, Si Mati telah dibawa ke bilik 3-05 di Asrama Jebat di mana dia dipukul dan ditendang oleh beberapa pelajar lain, termasuk perayu pertama. Pada keesokan harinya, 22 Mei 2017, di bilik 4-10, perayu pertama hingga kelima telah menangkap seterika wap pada badan Si Mati sementara perayu keenam mengarahkan mereka berbuat demikian. Tangan dan kaki Si Mati telah diikat semasa kejadian ini, dan dia menjerit dan menggelupur kesakitan semasa ditekak dengan seterika wap. Walaupun diseksa, Si Mati terus menafikan bahawa dia mencuri komputer riba tersebut. Pada 27 Mei 2017, perayu pertama, kedua, keempat dan keenam membawa Si Mati ke Klinik As-Salam di Bangi, Selangor, di mana Dr Azfar (“SP7”) merawat luka Si Mati. Mereka memberikan keterangan palsu bahawa kecederaan Si Mati berpunca daripada letupan wap semasa latihan di Port Dickson. Walaupun doktor mengesyorkan supaya Si Mati dibawa ke Hospital Serdang, mereka tidak berbuat demikian. Si Mati juga tidak dibenarkan menghubungi keluarganya sepanjang tempoh tersebut kerana pergerakannya dikawal sepenuhnya oleh perayu-perayu yang mempunyai pengaruh dan kawalan ke atas dirinya. Pada 1 Jun 2017, semasa berada di rumah sewa di Bangi, keadaan Si Mati tiba-tiba merosot dan dia akhirnya dibawa ke Hospital Serdang tetapi disahkan meninggal dunia. Bedah siasat yang dijalankan oleh Dr Salmah (“SP6”), seorang Pakar Perubatan Forensik, mendapati sebanyak



90 luka bakar meliputi 80% daripada badan Si Mati, termasuk luka bakar tahap pertama, kedua dan ketiga. Beliau menetapkan sebab kematian adalah luka bakar teruk. Di Mahkamah Tinggi, perayu pertama hingga kelima dituduh dengan kesalahan membunuh di bawah s 302 Kanun Keseksaan (“Kanun”) dibaca bersama s 34 Kanun, manakala perayu keenam dituduh dengan kesalahan bersubahat membunuh di bawah s 109 dibaca bersama s 302 Kanun. Selepas perbicaraan, Mahkamah Tinggi mensabitkan mereka dengan kesalahan mematikan orang dengan salah yang tidak terjumlah kepada kesalahan membunuh di bawah s 304(a) Kanun dan menjatuhkan hukuman penjara 18 tahun dari tarikh tangkap. Mahkamah Rayuan pula, setelah mendengar rayuan daripada pihak pendakwaan dan pembelaan, membuat keputusan untuk mengekalkan sabitan asal perayu-perayu lain bagi kesalahan di bawah s 330 Kanun tetapi mengetepikan keputusan Mahkamah Tinggi bagi perayu-perayu di dalam kes ini. Mahkamah Rayuan juga mendapati mereka bersalah atas kesalahan membunuh di bawah s 302. Perayu pertama hingga kelima disabitkan dengan kesalahan membunuh, dan perayu keenam disabitkan dengan kesalahan bersubahat membunuh, dan kesemua mereka menerima hukuman mati. Oleh itu, perayu-perayu membuat rayuan ini terhadap sabitan membunuh yang dikenakan ke atas mereka manakala rayuan mereka terhadap sabitan di bawah s 330 Kanun telah ditarik balik.

Diputuskan (membenarkan rayuan perayu-perayu, mengetepikan sabitan dan hukuman yang dijatuhkan oleh Mahkamah Rayuan, dan mengembalikan sabitan dan hukuman Mahkamah Tinggi di bawah s 304(a) Kanun):

- (1) Untuk membuktikan kesalahan membunuh di bawah s 300(c) Kanun, pihak pendakwaan perlu membuktikan bahawa kes tersebut telah melampaui keraguan yang munasabah berdasarkan tiga elemen berikut: (i) terdapat kecederaan anggota badan pada Si Mati; (ii) perayu-perayu berniat untuk menyebabkan kecederaan tersebut; dan (iii) kecederaan tersebut mencukupi, pada lazimnya, untuk menyebabkan kematian. (perenggan 69)
- (2) Bencana tubuh (kecederaan) yang terdapat pada badan Si Mati adalah suatu fakta yang tidak dipertikaikan oleh pihak pembelaan. Keterangan SP6 dan laporan bedah siasat yang dikemukakan di Mahkamah jelas menunjukkan adanya kecederaan luka bakar pada badan Si Mati dan menurut SP6 lagi, terdapat 90 luka bakar yang meliputi 80% daripada badan Si Mati. Kecederaan pada badan Si Mati ini juga telah disahkan lebih awal oleh SP7 yang merawat Si Mati pada 27 Mei 2017 dan 31 Mei 2017. SP7 telah melakukan “dressing” pada luka-luka yang dialami oleh Si Mati itu dan memberikan ubat-ubatan yang berkaitan. Sehubungan itu, elemen pertama ini telah dibuktikan oleh pihak pendakwaan. (perenggan 70)
- (3) Berhubung elemen kedua, Mahkamah tidak perlu menentukan jenis kecederaan yang diniatkan oleh perayu pertama hingga kelima terhadap Si Mati. Apa yang perlu dibuktikan ialah perayu pertama hingga kelima berniat mendatangkan kecederaan pada Si Mati dengan tekapan seterika wap terhadap Si Mati pada hari kejadian. Kecederaan luka bakar akibat tekapan seterika wap



tersebut bukanlah di luar jangkaan perayu-perayu. Penggunaan seterika wap pada Si Mati lebih kurang 90 kali serta jeritan Si Mati semasa ditangkap dengan seterika wap tersebut pasti dalam pengetahuan perayu-perayu bahawa seterika tersebut amat panas dan mendatangkan kecederaan yang serius terhadap Si Mati. Tertuduh-tertuduh tidak boleh selepas itu menyatakan bahawa mereka tidak mengetahui yang kesan tindakan menangkap seterika wap tersebut akan membawa kepada luka bakar ke atas Si Mati. Ini sesuatu yang di luar pemikiran akal manusia biasa. Jelasnya di sini, elemen kedua ini juga telah dibuktikan oleh pihak pendakwaan. (perenggan-perenggan 82-84)

(4) Bagi elemen ketiga, berdasarkan fakta kes, keterangan pakar SP6 pada peringkat pendakwaan sendiri telah tercabar semasa diperiksa-balas oleh peguam dengan pengesahan yang dibuat oleh SP6 bahawa kecederaan pada Si Mati tidak selalunya atau tidak semestinya menyebabkan kematian. Penggunaan frasa “boleh menyebabkan kematian” atau bahawa peluang hidup Si Mati adalah tipis tidak dapat melunturkan pernyataan SP6 bahawa kecederaan tersebut tidak selalunya atau tidak semestinya menyebabkan kematian. Penggunaan perkataan “boleh” hanya menunjukkan suatu kemungkinan sahaja dan ianya tidak semestinya terjadi. Sehubungan itu, salah satu elemen penting s 300(c) telah gagal dibuktikan oleh pihak pendakwaan. Justeru itu juga, Mahkamah Tinggi tidak sewajarnya memanggil perayu pertama hingga kelima untuk membela diri bagi kesalahan membunuh yang dihukum di bawah s 302 Kanun dan kesalahan bersubahat untuk membunuh di bawah s 109 dibaca bersama s 302 Kanun terhadap perayu keenam. Di peringkat pembelaan pula, Dr Rohayu (“SD19”), pakar dan Ketua Jabatan Perubatan Forensik, mempertikaikan dapatan SP6 dan berpendapat bahawa sebab kematian Si Mati ialah jangkitan paru-paru. Dengan keterangan SP6 yang tercabar semasa diperiksa balas dan dengan adanya keterangan SD19 yang mempertikaikan keterangan SP6, pihak pendakwaan juga didapati gagal membuktikan s 300(c) Kanun melampaui keraguan yang munasabah. (perenggan-perenggan 103-106)

(5) Inti pati bagi kesalahan di bawah s 304(a) Kanun adalah jelas, iaitu berlakunya suatu kematian terhadap seseorang, kematian tersebut disebabkan oleh perayu-perayu, dan perayu berniat menyebabkan kecederaan terhadap Si Mati yang mungkin menyebabkan kematian. Ketiga-tiga inti pati bagi kesalahan mematikan orang dengan salah yang tidak terjumlah kepada kesalahan membunuh orang di bawah s 304(a) Kanun telah dibuktikan oleh pihak pendakwaan melampaui keraguan yang munasabah. Oleh itu, niat perayu pertama hingga kelima adalah untuk menyebabkan kecederaan pada Si Mati dan kecederaan berkenaan mungkin menyebabkan kematian pada Si Mati. (perenggan-perenggan 108-109)

(6) Kesalahan bersubahat berlaku apabila seseorang itu menghasut melakukan kesalahan jenayah, mengambil bahagian dalam pakat jahat untuk melakukan kesalahan tersebut atau dengan sengaja membantu dalam kesalahan berkenaan. Mengenai kes terhadap perayu keenam, keterangan saksi-saksi pendakwaan,



terutamanya saksi mata, jelas menyatakan bahawa beliau telah memberikan arahan kepada perayu-perayu lain untuk menangkap seterika wap pada badan Si Mati di hari kejadian. Ini jelas termasuk dalam perbuatan menghasut (instigate) untuk melakukan kesalahan jenayah. Justeru itu, kesalahan persubahatan terhadap perayu keenam telah dibuktikan oleh pihak pendakwaan melampaui keraguan yang munasabah. (perenggan-perenggan 110, 113 & 114)

(7) Niat bersama di bawah s 34 Kanun boleh dibuktikan berdasarkan inferens daripada fakta dan keadaan sesuatu kes itu. Prinsip atau perundangan ini bersandarkan kepada penglibatan bersama dalam melakukan kesalahan tersebut dan tidak perlu dibuktikan siapa antara perayu-perayu yang sebenarnya menyebabkan kesalahan yang mereka dituduh. Di samping itu, niat bersama ini boleh wujud pada masa kejadian itu sendiri. Dalam kes ini, semua perayu-perayu berada di tempat kejadian dan dibuktikan bahawa perayu pertama hingga kelima telah menangkap seterika wap pada Si Mati. Hanya satu seterika sahaja yang digunakan. Jumlah tekapan seterika oleh setiap perayu adalah tidak relevan kerana satu tekapan seterika pada Si Mati pun, dengan niat bersama, adalah mencukupi untuk pemakaian s 34 Kanun. Perayu-perayu juga ditunjukkan telah mengawal Si Mati selepas kejadian dan berpakat untuk tidak membawa Si Mati ke hospital untuk mendapatkan rawatan. Penglibatan mereka tidak dapat dipertikaikan. Perayu keenam pula dibuktikan telah memberikan arahan kepada perayu pertama hingga kelima untuk menangkap seterika wap pada Si Mati. Daripada fakta dan keadaan kes ini, inferens yang munasabah ialah kesemua tertuduh mempunyai niat bersama untuk mendapatkan pengakuan Si Mati yang dikatakan mencuri komputer riba perayu pertama dengan mencederakan Si Mati dengan tekapan seterika wap dan akhirnya membawa kepada kematian Si Mati. Sehubungan itu, elemen niat bersama ini telah dibuktikan oleh pihak pendakwaan. (perenggan-perenggan 117-118)

(8) Perayu pertama hingga ketiga membuat penafian ada menangkap seterika wap pada badan Si Mati pada hari kejadian, manakala perayu keenam pula menafikan ada memberikan arahan kepada mereka untuk menangkap seterika wap pada badan Si Mati. Berhubung isu penafian dalam pembelaan kes ini, undang-undang adalah jelas bahawa penafian semata-mata tanpa sebarang keterangan lain yang boleh disandarkan oleh Mahkamah tidak dapat mencabar kes pendakwaan. Perayu pertama hingga ketiga, selain daripada menafikan ada menangkap seterika wap pada badan Si Mati, menyatakan bahawa seorang pelajar bernama Mubin Mustaza ('Mubin') yang sebenarnya menangkap seterika wap pada Si Mati pada hari kejadian. Walau bagaimanapun, perkara ini tidak disarankan kepada saksi-saksi pendakwaan di peringkat pendakwaan kes, terutama saksi mata, SP24 dan SP25. Malahan, semasa pemeriksaan-balas SP25, dia mengesahkan tidak nampak Mubin melakukan apa-apa kepada Si Mati pada hari kejadian tersebut. Seterusnya, perayu keempat menyatakan dalam pembelaannya bahawa perayu pertama dan kedua ada menangkap seterika wap pada badan Si Mati pada hari kejadian. Kegagalan pihak pembelaan menyarankan perkara ini kepada saksi-saksi pendakwaan membolehkan suatu



kesimpulan dibuat bahawa pembelaan tersebut merupakan sesuatu pembelaan fikir semula (afterthought). Sehubungan itu, perayu-perayu telah gagal menimbulkan keraguan yang munasabah terhadap kes pendakwaan dan dalam konteks ini, bagi kesalahan di bawah s 304(a) terhadap perayu pertama hingga kelima dan kesalahan persubahatan di bawah s 109 Kanun bagi kesalahan di bawah s 304(a) terhadap perayu keenam. (perenggan-perenggan 137-142)

(9) Sabitan perayu pertama hingga kelima bagi kesalahan membunuh yang dihukum di bawah s 302 Kanun dan kesalahan persubahatan membunuh terhadap perayu keenam di bawah s 109 Kanun dan dibaca bersama s 302 Kanun tidak dapat dipertahankan. Oleh itu, keputusan Mahkamah Rayuan yang mensabitkan perayu-perayu bagi kesalahan tersebut adalah diketepikan. Walau bagaimanapun, keterangan yang dikemukakan di Mahkamah ini mencukupi melampaui keraguan yang munasabah untuk sabitan bagi kesalahan mematikan orang dengan salah yang tidak terjumlah kepada kesalahan membunuh orang di bawah s 304(a) Kanun. Justeru itu, keputusan Mahkamah Tinggi yang mensabitkan perayu pertama hingga kelima bagi kesalahan di bawah s 304(a) Kanun dan mensabitkan perayu keenam bagi kesalahan bersubahat di bawah s 109 dibaca bersama s 304(a) dikembalikan. Hukuman terhadap perayu-perayu yang dijatuhkan oleh Hakim Mahkamah Tinggi juga dikekalkan, iaitu penjara 18 tahun dari tarikh tangkap. (perenggan-perenggan 144-145)

Kes-kes yang dirujuk:

- Abu Bakar Mohd Yusof lwn. Pendakwa Raya* [2025] 2 MLRA 431 (dirujuk)
Amathevelli P Ramasamy v. PP [2009] 1 MLRA 153 (dirujuk)
Barenda Kumar Ghosh v. Emperor AIR [1925] PC 1 (dirujuk)
Chan Pean Leon v. PP [1956] 1 MLRH 44 (dirujuk)
DA Duncan v. PP [1980] 1 MLRA 55 (dirujuk)
Datuk Haji Harun Haji Idris & Ors v. PP [1977] 1 MLRA 223 (dirujuk)
Farose Tamure Mohamad Khan v. PP & Other Appeals [2016] 6 MLRA 337 (dirujuk)
Krishna Rao Gurumurthi v. PP And Another Appeal [2009] 1 MLRA 23 (dirujuk)
Lee Ah Seng & Anor v. PP [2007] 1 MLRA 784 (dirujuk)
Lee Fah Sang v. PP [1967] 1 MLRA 459 (dirujuk)
Low Kian Boon & Anor v. PP [2010] 1 MLRA 418 (dirujuk)
Mat v. PP [1963] 1 MLRH 400 (dirujuk)
Megat Halim Megat Omar v. PP [2008] 2 MLRA 489 (dirujuk)
Mohamed Yasin Hussin v. PP [1976] 1 MLRA 603 (dirujuk)
Muharam Anson v. PP [1980] 1 MLRA 120 (dirujuk)
Munusamy Vengadasalam v. PP [1986] 1 MLRA 292 (dirujuk)
Namasiyiam Doraisamy v. PP & Other Cases [1987] 1 MLRA 73 (dirujuk)
Ong Chee Hoe v. PP [1999] 4 SLR 688 (dirujuk)
Pathmanabhan Nalliannan v. PP & Other Appeals [2016] 1 MLRA 126 (dirujuk)



Pendakwa Raya lwn. Mohd Noor Affendi Zauklfli & Rayuan Yang Lain [2025] 2 MLRA 903 (dirujuk)

PP v. Azilah Hadri & Anor [2015] 1 MLRA 431 (dirujuk)

PP v. Datuk Haji Harun Haji Idris & Ors [1977] 1 MLRH 438 (dirujuk)

PP v. Ling Tee Huah [1980] 1 MLRH 593 (dirujuk)

PP v. Mansor Md Rashid & Anor [1996] 2 MLRA 35 (dirujuk)

PP v. Muhammad Khairuanuar Baharuddin & Another Appeal [2025] 1 MLRA 65 (dirujuk)

PP v. Sanderasegaran Nithenantham [2024] 3 MLRA 798 (dirujuk)

PP v. Visuvanathan [1977] 1 MLRH 14 (dirujuk)

Rajwant Singh v. State Of Kerala AIR [1966] SC 1874 (dirujuk)

Seneviratne v. R [1936] 3 All ER 36 (dirujuk)

Shanmugam Munusamy v. PP [1998] 2 MLRA 344 (dirujuk)

State Of AP v. Rayavarapu Punnaya And Another [1977] AIR (SC) 45 (dirujuk)

Sudershan Kumar v. State Of Delhi [1974] AIR (SC) 2328 (dibezakan)

Tan Cheow Bock v. PP [1991] 1 MLRA 746 (dirujuk)

Tan Kim Ho & Anor v. PP [2009] 5 MLRA 612 (dirujuk)

Tham Kai Yau & Ors v. PP [1976] 1 MLRA 279 (dirujuk)

Ti Chuee Hiang v. PP [1995] 1 MLRA 354 (dirujuk)

Vaeyapuri v. PP [1965] 1 MLRA 143 (dirujuk)

Virsa Singh v. State Of Punjab (Crl) 579 (dirujuk)

Wang Wenfeng v. PP [2012] SGCA 47 (dirujuk)

Wong Swee Chin v. PP [1980] 1 MLRA 125 (dirujuk)

Zulkiple Mohamad v. PP [2022] 2 MLRA 70 (dirujuk)

Perundangan yang dirujuk:

Criminal Procedure Code, ss 156, 182A(1)

Evidence Act 1950, ss 45, 46, 114(g)

Penal Code [Ind], s 302

Penal Code, ss 34, 107, 109, 299, 300(a), (b), (c), (d), 302, 304(a), 330

Lain-lain yang dirujuk:

Ratanlal & Dhirajlal, *The Indian Penal Code*, 32nd Edn, ms 549, 1274

Kaunsel:

Bagi pihak perayu pertama & kedua: Amer Hamzah Arshad (Joshua Tay H'ng Foong, Lee Yee Woei & Siti Summaiyah Ahmad bersama beliau); Tetuan Amerbon & Assoc

Bagi pihak perayu ketiga: Hisyam Teh Poh Teik (Low Wei Loke bersama beliau); Tetuan Hisyam Teh



*Bagi pihak perayu keempat: M Ramachelvam (Ameerul Radzi Azlan bersama beliau);
Tetuan Rama-Rozi & Assoc*

*Bagi pihak perayu kelima: Hazman Ahmad (Premman Gopal & Rahimi Abdul Ghazi
bersama beliau); Omar Ismail Hazman & Co*

*Bagi pihak responden: Mangaiarkarasi Krishnan (Iznina Hanim Hashim, Solehah
Noratikah Ismail & Joy Jothi Nadrarasan bersama beliau);
Jabatan Peguam Negara*

[For the Court of Appeal judgment, please refer to *Muhammad Akmal Zuhairi
Azmal & Yang Lain lwn. Pendakwa Raya & Rayuan Lain* [2024] 5 MLRA 927]

PENGHAKIMAN

Nordin Hassan HMP

Pendahuluan

[1] Kes ini bermula dengan kehilangan sebuah komputer riba seorang pelajar di Universiti Pertahanan Nasional Malaysia (UPNM) tetapi berakhir dengan kejadian tragis dengan kematian Zulfarhan Osman bin Zulkarnain (Si Mati), yang juga seorang pelajar di universiti yang sama. Kes ini juga mendapat liputan akhbar dan media massa yang meluas di Malaysia atas sebab, antaranya, kematian Si Mati yang dianggap kejam akibat kecederaan luka bakar yang banyak daripada tekapan seterika wap oleh pelaku-pelaku yang juga merupakan penuntut di universiti yang sama. Mahkamah ini, seperti biasa, memutuskan rayuan kes ini berdasarkan undang-undang yang mantap dan analisis fakta daripada keterangan yang dikemukakan di Mahkamah.

[2] Setelah siasatan dilengkapkan, pelaku-pelaku dalam kes ini telah dituduh dengan kesalahan-kesalahan berdasarkan penglibatan mereka. Lima orang daripada pelaku-pelaku tersebut telah dituduh di Mahkamah Tinggi Kuala Lumpur dengan kesalahan membunuh yang dihukum di bawah s 302 Kanun Keseksaan dan dibaca bersama s 34 Kanun yang sama iaitu dengan niat bersama melakukan kesalahan berkenaan. Mereka ialah Muhammad Akmal Zuhairi bin Azmal (tertuduh pertama), Muhammad Azamuddin bin Mad Sofi (tertuduh kedua), Muhammad Najib bin Mohd Razi (tertuduh ketiga), Muhammad Afif Najmudin bin Azahat (tertuduh keempat) dan Mohamad Shobirin bin Sabri (tertuduh kelima).

[3] Di samping itu, seorang lagi pelajar di universiti tersebut, Abdoul Hakeem bin Mohd Ali, tertuduh keenam, dituduh dengan kesalahan bersubahat melakukan kesalahan membunuh tersebut iaitu kesalahan di bawah s 109 Kanun Keseksaan dibaca bersama s 302 Kanun yang sama.



[4] Selain itu, terdapat juga pelaku-pelaku lain, iaitu seramai sembilan belas orang pelajar UPNM yang dituduh di Mahkamah bagi kesalahan dengan sengaja menyebabkan kecederaan terhadap Si Mati bagi maksud mendapatkan pengakuan, iaitu suatu kesalahan di bawah s 330 Kanun Keseksaan dibaca bersama s 34 Kanun yang sama.

[5] Di akhir perbicaraan, Hakim Bicara Mahkamah Tinggi Kuala Lumpur telah mendapati mereka bersalah dan mensabitkan tertuduh pertama hingga tertuduh kelima hanya dengan kesalahan mematikan orang dengan salah yang tidak terjumlah kepada kesalahan membunuh orang, iaitu kesalahan di bawah s 304(a) Kanun Keseksaan dan bukan dengan kesalahan membunuh yang dihukum di bawah s 302 Kanun yang sama, iaitu pertuduhan asal terhadap mereka. Hakim Bicara seterusnya menjatuhkan lima-kelima mereka dengan hukuman pemenjaraan selama 18 tahun dari tarikh tangkap. Hakim Bicara juga menjatuhkan Abdoul Hakeem bin Mohd Ali dengan hukuman yang sama atas kesalahan persubahatan tertuduh keenam tersebut.

[6] Hakim Bicara juga telah mensabitkan tertuduh-tertuduh yang dituduh dengan kesalahan di bawah s 330 Kanun Keseksaan yang dibaca bersama s 34 kecuali tertuduh ketiga, tertuduh keenam dan Muhammad Akmal Akif bin Alias, iaitu tertuduh kelapan, yang telah dilepaskan dan dibebaskan. Tertuduh-tertuduh yang disabitkan bagi kesalahan ini telah dijatuhkan hukuman penjara selama 3 tahun dari tarikh tangkap.

[7] Kesemua tertuduh yang telah disabitkan dengan kesalahan di bawah s 304(a) dan s 330 Kanun Keseksaan tersebut telah membuat rayuan ke Mahkamah Rayuan terhadap keputusan Hakim Bicara berkenaan. Sementara itu, pihak pendakwaan telah membuat rayuan terhadap sabitan tertuduh-tertuduh yang disabitkan di bawah s 304(a) dan bukan sabitan di bawah pertuduhan asal, iaitu di bawah s 302 bagi kesalahan membunuh dan persubahatan membunuh yang dibuat terhadap tertuduh keenam, Abdoul Hakeem bin Mohd Ali.

[8] Mahkamah Rayuan pula, setelah mendengar hujahan kedua-dua pihak, telah mengekalkan sabitan dan hukuman terhadap tertuduh-tertuduh bagi kesalahan di bawah s 330 Kanun Keseksaan tetapi mengetepikan sabitan di bawah s 304(a) oleh Hakim Bicara dan menggantikan dengan sabitan bagi kesalahan membunuh yang dihukum di bawah s 302 Kanun Keseksaan. Seterusnya, tertuduh pertama hingga kelima disabitkan dengan kesalahan membunuh dan tertuduh keenam, Abdoul Hakeem bin Mohd Ali, yang dituduh bagi kesalahan bersubahat untuk membunuh, telah juga disabitkan dengan kesalahan tersebut. Kesemua mereka dijatuhkan hukuman gantung sampai mati.

[9] Tertuduh-tertuduh yang tidak berpuas hati dengan keputusan Mahkamah Rayuan tersebut telah membuat rayuan ke Mahkamah ini. Walau bagaimanapun, di awal pendengaran kes di Mahkamah ini, rayuan berhubung sabitan terhadap tertuduh-tertuduh bagi kesalahan di bawah s 330 Kanun Keseksaan telah ditarik balik dan rayuan hanya diteruskan terhadap sabitan



bagi kesalahan membunuh yang dihukum di bawah s 302 dan kesalahan persubahatan membunuh di bawah s 109 dibaca bersama s 302 kanun yang sama.

[10] Di Mahkamah ini, kes rayuan No 05(M)-103-07/2024(W) merupakan kes rayuan yang difailkan oleh tertuduh pertama hingga kelima terhadap sabitan di bawah s 302 Kanun Keseksaan oleh Mahkamah Rayuan dan kes No 05(M)-107-07/2024(W) merupakan kes rayuan yang difailkan Abdoul Hakeem bin Mohd Ali terhadap sabitannya bagi kesalahan bersubahat membunuh di bawah s 109 Kanun Keseksaan dibaca dengan s 302 Kanun yang sama. Tertuduh pertama hingga kelima dengan itu merupakan perayu pertama hingga kelima dalam kes rayuan di Mahkamah ini dan Abdoul Hakeem bin Mohd Ali merupakan perayu bagi kes No 05(M)-107-07/2024(W).

Kes Pendakwaan

[11] Naratif kes pendakwaan dinyatakan di sini mengikut kronologi dan masa peristiwa itu berlaku untuk memudahkan pemahaman fakta dan isu-isu yang berbangkit daripada fakta-fakta yang dikemukakan oleh pihak pendakwaan. Pada asasnya, kes pendakwaan bersandarkan keterangan langsung selain daripada keterangan mengikut keadaan. Keterangan langsung tersebut antaranya ialah melalui saksi mata dalam kes ini, iaitu Ahmad Senabil bin Mohamad (SP24), Muhammad Shafiq bin Abdullah (SP25) dan Muhamad Shafiq Muhaimin bin Zakaria (SP26). Mereka merupakan pelajar-pelajar di UPNM dan yang melihat sendiri kejadian yang berlaku terhadap Si Mati. Selain itu, pihak pendakwaan juga bergantung pada keterangan pakar forensik iaitu Dr Salmah binti Arshad (SP6), yang melakukan bedah siasat terhadap Si Mati untuk membuktikan wujudnya kecederaan yang mencukupi pada lazimnya untuk menyebabkan kematian Si Mati. Ini adalah bagi maksud pembuktian s 300(c) Kanun Keseksaan iaitu salah satu elemen bagi pembuktian kesalahan membunuh yang dihukum di bawah s 302 Kanun yang sama.

Kehilangan Komputer Riba Muhammad Akmal Zuhairi Azmal, Perayu Pertama Atau Tertuduh Pertama Di Mahkamah Tinggi

[12] Pada 17 Mei 2017, perayu pertama telah kehilangan sebuah komputer riba miliknya di bilik 4-10, Blok Asrama Jebat, UPNM. Pencarian yang dibuat oleh perayu pertama dan rakannya, SP25, tidak berhasil menemukan komputer riba tersebut. Ini termasuklah pencarian di bilik Si Mati iaitu bilik 3-06, Asrama Jebat.

[13] Perayu pertama kemudian telah mendapatkan pertolongan daripada seorang rakannya, Muhammad Ashraf bin Haji Abdullah, tertuduh kelapan belas di Mahkamah Tinggi, untuk meminta bapa Muhammad Ashraf, seorang pengamal perubatan Islam yang dikatakan boleh mengesan barang hilang dan orang yang mengambilnya. Bapa Muhammad Ashraf, Abdullah bin Md Seh (SP13) dikatakan telah membuat solat hajat dan istikharah dan mendapat



petunjuk bahawa Si Mati yang mengambil komputer riba tersebut. Perkara ini telah diberitahu kepada anaknya, Muhammad Ashraf, yang kemudiannya memaklumkan kepada perayu pertama.

Kejadian Pada 21 Mei 2017 Di Bilik 3-05 Asrama Jebat UPNM

[14] Pada 21 Mei 2017, lebih kurang pukul 1.00 pagi, perayu pertama dan S Hari Krishna Rao (SP20) telah pergi ke bilik 3-06 untuk berjumpa dengan Si Mati. Setelah berjumpa, Si Mati telah dibawa oleh mereka ke bilik sebelah, iaitu bilik 3-05. Di situ, SP25 telah mengecam 4 orang pelajar yang memukul dan menendang Si Mati, iaitu perayu pertama, Muhammad Hasif bin Ismail (tertuduh keenam semasa di Mahkamah Tinggi), Muhammad Amirul Asraff bin Mala (tertuduh kesembilan di Mahkamah Tinggi), dan Muhammad Adib Iman bin Fuad Adi Sany (tertuduh ketujuh di Mahkamah Tinggi). SP26, yang datang dari biliknya di bilik No 5-09 ke bilik 3-05 tersebut pula mengesahkan perayu pertama, tertuduh ketujuh dan Mohamad Syazwan bin Musa (tertuduh kelapan di Mahkamah Tinggi) ada memukul Si Mati pada kejadian di bilik 3-05 tersebut. Perbuatan memukul dan menendang Si Mati hanya berakhir setelah azan subuh berkumandang pada hari berkenaan. SP25 kemudian melihat Si Mati dalam keadaan lemah dan terduduk di atas lantai dalam keadaan kesakitan. Dalam kejadian tersebut, Si Mati tidak mengaku mencuri komputer riba perayu pertama walaupun dipukul oleh perayu pertama dan rakan-rakannya. Si Mati kemudiannya kembali ke biliknya pada lebih kurang pukul 6:30 petang hari tersebut dan dilihat oleh SP25 masih dalam kesakitan sehingga mengalami kesukaran untuk memakai bajunya.

Kejadian Pada 22 Mei 2017 Di Bilik 4-10, Asrama Jebat UPNM Antara Pukul 1:30 Pagi Dan 4:30 Pagi

[15] Pada tarikh 22 Mei 2017 ini, perayu Abdoul Hakeem (tertuduh keenam) dan tertuduh kesembilan belas, telah datang mencari Si Mati di bilik 3-05 dan apabila Si Mati tidak ditemui di bilik tersebut, mereka mencari Si Mati di tempat lain. Setelah Si Mati ditemui, mereka membawa Si Mati ke bilik 4-10, Asrama Jebat, dan dalam tempoh masa yang dinyatakan pada hari yang sama, 22 Mei 2017, SP24 yang berada di bilik tersebut menyaksikan Si Mati disoal oleh perayu Abdoul Hakeem mengenai kehilangan komputer riba perayu pertama dan apabila dia tidak berpuas hati dengan jawapan Si Mati, perayu Abdoul Hakeem telah menumbuk Si Mati di bahagian perut. Tertuduh kesembilan belas dan beberapa pelajar lain juga kemudiannya turut sama memukul Si Mati. Pelajar-pelajar lain yang terlibat sama dan dicamkan oleh SP24 ialah perayu pertama, Muhammad Azamuddin bin Mad Sofi (perayu kedua), Muhammad Najib bin Mohd Razi (perayu ketiga) Muhammad Afif Najmudin bin Azahat (perayu keempat), tertuduh kesebelas, tertuduh ketiga belas, tertuduh kelima belas, tertuduh keenam belas, tertuduh ketujuh belas, dan tertuduh kelapan belas. SP25 pula menyaksikan Si Mati dipukul oleh perayu Abdoul Hakeem, tertuduh ketiga belas, tertuduh keempat belas dan tertuduh kesembilan belas.



Kejadian Pada 22 Mei 2017 Di Bilik 4-10, Asrama Jebat UPNM Antara Jam 4.45 Pagi Dan 5.45 Pagi

[16] Pada tarikh dan tempoh masa ini, SP24 menyaksikan perayu pertama, perayu kedua, perayu ketiga, perayu keempat dan perayu kelima menangkap seterika wap pada badan Si Mati sementara perayu Abdoul Hakeem memberikan arahan kepada mereka untuk melakukan perbuatan tersebut. SP25 juga melihat sendiri bagaimana perayu pertama hingga perayu kelima melakukan perbuatan menangkap badan Si Mati dengan seterika wap tersebut. Pada ketika itu, tangan dan kaki Si Mati dalam keadaan terikat. Si Mati pada masa tersebut masih menafikan bahawa dia telah mencuri komputer riba perayu pertama.

[17] Si Mati yang ketika itu diikat tangan dan kakinya menjerit dan menggelupur apabila ditekap dengan seterika wap yang panas.

Peristiwa Selepas Kejadian Si Mati Dipukul Dan Ditekap Dengan Seterika Wap

[18] Sebaik sahaja selepas kejadian menangkap seterika pada badan Si Mati, perayu pertama membuka ikatan pada Si Mati dan perayu pertama telah diarahkan oleh perayu Abdoul Hakeem untuk menjaga Si Mati. SP25 kemudian ada berjumpa dengan Si Mati di bilik 4-10 tersebut dalam keadaan Si Mati berselimut dan berbaring di atas katil di bilik berkenaan. Setelah itu, SP25 tidak dapat berjumpa Si Mati kerana bilik 4-10 berkenaan sentiasa dikunci dan orang lain tidak dibenarkan masuk.

[19] Pada tarikh 22 Mei 2017 itu juga, lebih kurang pukul 6.00 petang, Muhammad Aiman Aufa bin Asmadi Affendi (SP23), seorang pelajar UPNM, pergi ke bilik 4-10 tersebut dan melihat Si Mati terbaring di atas katil dengan keadaan kulit badannya menggelembung dan terdapat tompokan hitam serta sedikit berdarah di kulit badannya. Di dalam bilik tersebut juga SP23 mendengar perayu pertama, perayu kedua, perayu ketiga, tertuduh keempat belas dan seorang pelajar Alif Farhan, berbual yang antara isi perbualan tersebut ialah mereka tidak mahu membawa Si Mati ke hospital dan ingin merawat sendiri Si Mati kerana khuatir diketahui oleh jurulatih mereka. Jika diketahui oleh jurulatih, mereka boleh diambil tindakan dibuang dari UPNM atau dikenakan hukuman. SP23 kemudiannya membuat satu surat layang (eks P17) yang kandungannya ditulis "Kalau ada hati perasaan sifat kemanusiaan saya minta sangat pergi ambush bilik 4-10 Blok Satria (Dpn Masjid). Dalam tu ada pesakit yang sangat perlukan rawatan segera. SEGERA!!!" . Surat layang ini telah diselitkan pada pagar Rumah Sakit Angkatan Tentera (RESAT) pada keesokan harinya iaitu pada 23 Mei 2017.

[20] Pada 23 Mei 2017 juga, semasa SP23 berada di biliknya di No 406, Blok Jebat, perayu pertama telah datang ke bilik tersebut memaklumkan kepada SP23 untuk menumpangkan Si Mati di bilik SP23 berkenaan. Si Mati telah dibawa masuk ke bilik tersebut dengan kerusi roda, kemudian dipapah dan



diletakkan oleh perayu pertama di sebuah katil di hujung bilik berkenaan. Perayu kedua dan tertuduh keenam belas telah diminta oleh perayu pertama untuk menjaga Si Mati di bilik tersebut. Perayu pertama ada memaklumkan kepada SP23 bahawa jurulatih hendak memeriksa bilik 4-10 iaitu bilik Si Mati ditempatkan sebelum itu.

[21] Semasa Si Mati di bilik 4-06 tersebut, perayu pertama dan tertuduh keenam belas ada menyapu ubat pada badan Si Mati dan Si Mati masih boleh makan sendiri serta pergi ke bilik air. SP23 juga ada berbual dengan Si Mati dan Si Mati ada memberitahu SP23 jika ingin menyapu ubat pada badannya, tunggu semasa Si Mati tidur kerana jika Si Mati sedar, dia akan merasa sakit apabila itu dilakukan.

[22] Selanjutnya, pada 27 Mei 2017, perayu pertama, perayu kedua, perayu keempat dan perayu Abdoul Hakeem, telah membawa Si Mati ke klinik As-Salam di Bangi, Selangor. Apabila bertemu dengan Doktor Azfar bin Hussin (SP7), mereka telah meminta SP7 mencuci luka Si Mati dan membuat “dressing” luka pada Si Mati. Mereka juga memaklumkan SP7 bahawa kecederaan yang dialami oleh Si Mati disebabkan oleh letupan yang melibatkan wap semasa latihan di Port Dickson, Negeri Sembilan. SP7 yang memeriksa Si Mati menjelaskan kepada mereka bahawa Si Mati perlu dibawa ke Hospital Serdang untuk rawatan dan mengeluarkan surat rujukan (eks P13). SP7 juga menawarkan kereta ambulan untuk membawa Si Mati ke Hospital. Walaupun begitu, atas permintaan mereka, SP7 memberikan rawatan terhadap kecederaan Si Mati dan memberikan ubat serta antibiotik untuk Si Mati. Mereka juga memaklumkan kepada SP7 bahawa mereka boleh membawa Si Mati ke hospital dengan kereta. Walau bagaimanapun, Si Mati tidak dibawa oleh mereka ke hospital seperti yang disarankan oleh SP7.

[23] Ketika rawatan diberikan pada Si Mati, SP7 mendapati “vital sign” Si Mati dari segi tekanan darah, denyutan nadi dan suhu badannya adalah stabil.

[24] Seterusnya, pada 30 Mei 2017, lebih kurang pukul 12:00 malam, perayu pertama dan perayu kedua telah membawa Si Mati ke rumah sewa rakan perayu pertama iaitu Muhammad Nazrin bin Mohd Radzuan (SP11) di D’Centrium Residences di Jalan Ikram, Uniten, Bangi. Perayu pertama juga ada memaklumkan kepada SP11 bahawa mereka ingin ke klinik untuk rawatan Si Mati.

[25] Pada 31 Mei 2017, perayu pertama dan perayu kedua telah sekali lagi membawa Si Mati berjumpa SP7 di Klinik As-Salam. Apabila ditanya oleh SP7 mengapa Si Mati tidak dibawa ke hospital, mereka memaklumkan bahawa Si Mati telah beransur baik. Si Mati, perayu pertama dan perayu kedua juga telah meminta SP7 membuat “dressing” pada kecederaan Si Mati. Permintaan mereka tersebut dipenuhi oleh SP7 dan pada masa yang sama meminta Si Mati dibawa ke hospital, SP7 juga mendapati “vital sign” Si Mati dalam keadaan biasa. SP7 juga sekali lagi mengeluarkan surat rujukan (eks P14) untuk Si Mati dirujuk ke Hospital Serdang.



Kematian Si Mati

[26] Setelah rawatan di Klinik As-Salam tersebut, Si Mati telah dibawa semula ke rumah sewa SP11. Keesokan harinya, pada 1 Jun 2017, ketika berbuka puasa, SP11 melihat Si Mati berselera memakan bubur yang mereka beli di Bazar Ramadhan. Sebaik selesai solat Maghrib, tiba-tiba perayu kedua memanggil SP11 untuk melihat Si Mati yang didapati dalam keadaan kaku dan tidak bergerak. Perayu pertama seterusnya menghubungi ambulans dan Si Mati kemudiannya dibawa ke Hospital Serdang. Di Hospital Serdang, Si Mati dibawa ke Jabatan Kecemasan dan diperiksa oleh Dr Muhammad Faiq Nabil bin Ramli yang mendapati Si Mati tidak menunjukkan tanda-tanda hidup lalu diberikan CPR. Walau bagaimanapun, Si Mati telah disahkan meninggal dunia pada pukul 9.25 malam hari tersebut oleh pihak hospital.

Hasil Bedah Siasat Dan Punca Kematian Si Mati

[27] Pada 2 Jun 2017, Dr Salmah binti Arshad (SP6), Pakar Perubatan Forensik, Hospital Serdang, telah melakukan bedah siasat terhadap Si Mati. SP6 mendapati ada 90 luka bakar pada badan Si Mati yang terdiri daripada luka bakar peringkat 1, 2 dan 3 (1st, 2nd and 3rd degree burn). Ini meliputi 80% daripada badan Si Mati. SP6 menyatakan dalam laporan bedah siasatnya bahawa sebab kematian Si Mati ialah luka bakar (severe burn).

Prosiding Di Mahkamah Tinggi

[28] Di akhir kes pendakwaan, setelah mempertimbangkan keterangan yang dikemukakan oleh pihak pendakwaan, Hakim Bicara memutuskan bahawa suatu kes *prima facie* telah dibuktikan bagi kesalahan-kesalahan terhadap tertuduh-tertuduh seperti yang berikut:

- (i) Terhadap perayu pertama, perayu kedua, perayu ketiga, perayu keempat dan perayu kelima bagi kesalahan membunuh yang dihukum di bawah s 302 Kanun Keseksaan;
- (ii) Terhadap perayu Abdoul Hakeem, bagi kesalahan bersubahat membunuh di bawah s 109 Kanun Keseksaan dibaca bersama s 302 Kanun yang sama;
- (iii) Terhadap kesemua tertuduh kecuali perayu kelima, perayu Abdoul Hakeem dan tertuduh kelapan bagi kesalahan pada 21 Mei 2017 iaitu dengan sengaja menyebabkan cedera terhadap Si Mati bagi maksud mendapatkan pengakuan di bawah s 330 Kanun Keseksaan;
- (iv) Terhadap kesemua tertuduh, kecuali perayu kelima, bagi kesalahan yang sama yang dilakukan pada 22 Mei 2017, iaitu di bawah s 330 Kanun Keseksaan.



[29] Sehubungan itu, kesemua tertuduh berkenaan telah dipanggil untuk membela diri atas pertuduhan-pertuduhan yang dikemukakan terhadap mereka.

[30] Berdasarkan alasan penghakiman Hakim Bicara, kesalahan di bawah s 330 Kanun Keseksaan bagi tertuduh-tertuduh berkenaan telah dibuktikan antara lainnya, melalui keterangan langsung saksi mata iaitu SP24, SP25 dan SP26. Sementara itu, bagi kesalahan membunuh dan persubahatan membunuh, Hakim Bicara telah juga bersandar pada keterangan langsung, khususnya keterangan saksi SP24, SP25, dan keterangan forensik daripada Dr Salmah (SP6). Hakim Bicara juga telah membuat dapatan fakta bahawa SP24 dan SP25 ialah saksi yang boleh dipercayai (credible).

[31] Berhubung kesalahan membunuh yang dihukum di bawah s 302 Kanun Keseksaan berkenaan, Hakim Bicara memutuskan bahawa s 300(c) Kanun Keseksaan terpakai iaitu kecederaan terhadap Si Mati mencukupi pada keadaan biasa untuk menyebabkan kematian. Di perenggan [236], Hakim Bicara menjelaskan seperti yang berikut:

“[236] Oleh itu, kecederaan ini pada ZF adalah kecederaan yang cukup dalam keadaan biasa membawa kematian dan jatuh kepada klausa (c) s 300.”

Kes Pembelaan

[32] Memandangkan rayuan di hadapan Mahkamah ini hanya terhadap sabitan berhubung kesalahan membunuh terhadap perayu pertama hingga perayu kelima dan kesalahan persubahatan membunuh terhadap perayu Abdoul Hakeem, fokus utama akan diberikan terhadap pembelaan mereka semasa di peringkat pembelaan di Mahkamah Tinggi bagi kesalahan-kesalahan ini.

Pembelaan Perayu Pertama

[33] Pembelaan Muhammad Akmal Zuhairi Azmal (perayu pertama), secara asasnya menafikan ada memukul atau menangkap Si Mati dengan seterika wap pada tarikh kejadian berkenaan. Pada 22 Mei 2017 tersebut, di bilik 4-10, perayu pertama hanya menolak badan Si Mati dan mengacah-acah atau mencucuh seterika wap ke badan Si Mati tanpa menyentuh badan Si Mati. Si Mati dikatakan telah ditekap dengan seterika wap oleh pelajar lain yang bernama Mubin Mustaza. Penama Mubin Mustaza atau nama penuhnya Mubin Mustaza bin Iskandar yang disebut oleh perayu pertama dalam keterangannya ini bukan merupakan salah seorang yang dituduh dengan sebarang kesalahan di Mahkamah.

Pembelaan Perayu Kedua

[34] Muhammad Azamuddin Mad Sofi (perayu kedua) juga dalam keterangan bersumpahannya, menyatakan bahawa pada 22 Mei 2017 di bilik 4-10 tersebut, perayu kedua tidak pernah memukul Si Mati tetapi, seperti perayu pertama, hanya menolak badan Si Mati. Perayu kedua mengaku ada melakukan seterika



wap pada badan Si Mati tanpa menyentuh badan Si Mati. Tindakan ini dibuat hanya untuk menggertak atau menakutkan Si Mati. Perayu kedua juga menyatakan bahawa pelajar bernama Mubin Mustaza yang menangkap seterika wap tersebut pada badan Si Mati.

Pembelaan Perayu Ketiga

[35] Seterusnya, Muhammad Najib Mohd Razi (perayu ketiga) memberikan keterangan antara lain, pada 22 Mei 2017 berkenaan, perayu ketiga dari bilik 4-11, telah kembali ke biliknya di bilik 4-10 dan berjalan menuju ke katilnya. Ketika itu, perayu ketiga dihalang oleh perayu Abdoul Hakeem dan meminta perayu ketiga menangkap seterika wap pada Si Mati dan pada masa yang sama, ada seseorang menghulur seterika wap kepada perayu ketiga lalu dipegang oleh perayu ketiga. Tiba-tiba perayu ketiga mendengar Si Mati menjerit lalu perayu ketiga melepaskan seterika tersebut ke atas meja. Perayu ketiga kemudiannya beredar ke katilnya dan tidur. Perayu ketiga juga menafikan ada menangkap seterika wap pada badan Si Mati.

Pembelaan Perayu Keempat

[36] Perayu keempat, Muhammad Afif Najmudin Azahat pula dalam keterangannya, menjelaskan bahawa pada 22 Mei 2017 di bilik 4-10 tersebut, perayu keempat ada menangkap seterika wap pada peha Si Mati sebanyak dua kali tetapi tidak berniat mencederakan atau untuk membunuh Si Mati. Perayu keempat juga mengesahkan bahawa perayu pertama, perayu kedua dan Mubin Mustaza ada menangkap seterika wap pada badan Si Mati pada hari kejadian.

Pembelaan Perayu Kelima

[37] Mohamad Shobirin Sabri (perayu kelima) pula menjelaskan dalam keterangannya, iaitu pada 22 Mei 2017 di bilik 4-10 berkenaan, perayu kelima ada menangkap seterika wap pada bahagian kaki Si Mati hanya sekali. Ketika itu Si Mati menjerit lalu menarik kakinya dan cuba menepis. Setelah itu perayu kelima keluar dari bilik tersebut.

Pembelaan Perayu Abdoul Hakeem

[38] Berhubung dengan kesalahan bersubahat untuk membunuh terhadap perayu Abdoul Hakeem, perayu dalam pembelaannya menyatakan bahawa pada 22 Mei 2017 di bilik 4-10 berkenaan, perayu tidak pernah memberikan apa-apa arahan kepada sesiapa untuk menangkap seterika wap pada tubuh Si Mati. Walau bagaimanapun, perayu mengesahkan perayu ketiga ada menangkap seterika wap pada lengan Si Mati dan Mubin Mustaza pula menangkap seterika berkenaan pada badan Si Mati.



Keterangan Pakar SD19 Semasa Peringkat Pembelaan

[39] Pihak pembelaan juga telah memanggil Dr Rohayu binti Shahr Adnan (SD19), Pakar Perunding, Jabatan Perubatan Forensik, Hospital Sungai Buloh. SD19 yang tidak terlibat dalam bedah siasat Si Mati memberikan pendapatnya berdasarkan gambar-gambar Si Mati dan slaid-slaid mikroskopik organ Si Mati dan laporan postmortem yang disediakan oleh Dr Salmah (SP6). SD19 memberikan keterangan, antara lain, bahawa terdapat percanggahan berhubung deskripsi luka bakar yang dinyatakan oleh SP6 dan kesan luka bakar hanya meliputi 67% badan Si Mati. SD19 juga menjelaskan kecederaan luka bakar Si Mati tidak menyebabkan kematian Si Mati dan punca lain yang juga boleh menyebabkan kematian Si Mati tidak boleh diketepikan. SD19 juga membuat dapatan bahawa punca kematian Si Mati ialah jangkitan paru-paru.

Keputusan Hakim Bicara Di Akhir Kes Pembelaan

[40] Hakim Bicara yang telah meneliti keterangan pihak pembelaan dan juga pihak pendakwaan, mendapati kesalahan membunuh yang dihukum di bawah s 302 tidak dapat dibuktikan oleh pihak pendakwaan melampaui keraguan yang munasabah terhadap perayu pertama hingga perayu kelima dan sebaliknya, kesalahan yang berjaya dibuktikan ialah kesalahan mematikan orang dengan salah yang tidak terjumlah kepada kesalahan membunuh orang, iaitu kesalahan yang boleh dihukum di bawah s 304(a) Kanun Keseksaan. Sehubungan itu, perayu pertama hingga perayu kelima telah disabitkan dengan kesalahan di bawah seksyen ini sementara perayu Abdoul Hakeem bagi kesalahan persubahatan. Mereka semua kemudiannya dijatuhkan hukuman 18 tahun penjara dari tarikh tangkap.

[41] Bagi maksud penjelasan menyeluruh, Hakim Bicara juga mendapati pihak pembelaan gagal menimbulkan keraguan yang munasabah bagi kesalahan di bawah s 330 Kanun Keseksaan terhadap tertuduh-tertuduh lalu mensabitkan mereka bagi kesalahan tersebut. Tertuduh-tertuduh berkenaan kemudiannya dijatuhkan hukuman penjara selama 3 tahun dari tarikh tangkap.

Prosiding Di Mahkamah Rayuan

[42] Kedua-dua pihak yang tidak berpuas hati dengan keputusan Hakim Bicara tersebut telah mengemukakan rayuan ke Mahkamah Rayuan. Pihak pembelaan tidak berpuas hati dengan sabitan bagi kesalahan di bawah s 330 Kanun Keseksaan dan s 304(a) Kanun yang sama. Sementara itu, pihak pendakwaan pula tidak berpuas hati dengan sabitan di bawah s 304(a) dan bukannya bagi kesalahan membunuh yang boleh dihukum di bawah s 302 Kanun yang sama.

[43] Mahkamah Rayuan, setelah mendengar hujahan daripada kesemua pihak, mendapati, bagi sabitan di bawah s 330 Kanun Keseksaan, Hakim Bicara telah membuat penilaian yang betul apabila menerima keterangan SP24 dan SP25, iaitu saksi-saksi mata yang melihat sendiri kejadian yang berlaku terhadap Si



Mati. Mahkamah Rayuan juga mendapati tiada alasan lain untuk mengganggu keputusan Hakim Bicara berhubung sabitan bagi kesalahan ini. Sehubungan itu, sabitan bagi kesalahan ini dikekalkan.

[44] Walau bagaimanapun, berhubung dengan sabitan di bawah s 304(a) Kanun Keseksaan, Mahkamah Rayuan mendapati pihak pendakwaan telah berjaya membuktikan elemen s 300(c) Kanun Keseksaan dan Hakim Bicara terkhilaf apabila hanya mensabitkan perayu-perayu bagi kesalahan di bawah s 304(a). Diputuskan, perayu-perayu sewajarnya disabitkan bagi kesalahan membunuh yang dihukum di bawah s 302 Kanun yang sama. Mahkamah Rayuan dalam membuat keputusan ini antara lain, menjelaskan bahawa Hakim Bicara adalah betul apabila tidak menerima keterangan Dr Rohayu (SD19) yang tidak melakukan bedah siasat terhadap Si Mati. Seterusnya, Mahkamah Rayuan bersetuju dengan pendapat SP6 bahawa sebab kematian Si Mati ialah luka bakar dan luka bakar itu pada lazimnya boleh menyebabkan kematian.

[45] Mahkamah Rayuan juga memutuskan bahawa perayu Abdoul Hakeem bersubahat membunuh Si Mati apabila memberikan arahan untuk menangkap Si Mati dengan seterika wap pada tarikh dan masa kejadian.

[46] Sehubungan itu juga, perayu pertama hingga kelima disabitkan dengan kesalahan membunuh dan perayu Abdoul Hakeem disabitkan dengan kesalahan bersubahat untuk membunuh. Keenam-enam mereka kemudiannya dijatuhkan hukuman gantung sampai mati.

Rayuan Di Mahkamah Ini

[47] Di Mahkamah ini, peguam utama yang berhujah mewakili perayu pertama dan kedua ialah Encik Amer Hamzah bin Arshad, perayu ketiga, peguam Datuk Hisyam Teh Poh Teik, perayu keempat, peguam Dato' Sri M. Ramachelvam, perayu kelima, peguam Dato' Hazman bin Ahmad dan perayu Abdoul Hakeem diwakili oleh Datuk Mohd Zamri bin Mohd Idrus.

Hujahan Peguam Perayu Pertama Dan Perayu Kedua

(i) Pertikaian berhubung punca kematian Si Mati.

[48] Pertamanya, peguam mempertikaikan punca kematian Si Mati ialah luka bakar kerana terdapat punca lain yang dikemukakan oleh pihak pembelaan untuk pertimbangan Mahkamah. Ini antara lain, berdasarkan keterangan Dr Rohayu (SD19) yang merumuskan bahawa sebab kematian Si Mati ialah jangkitan paru-paru. Keterangan SD19 ini walaupun ditolak oleh Hakim Bicara, diujahkan bahawa undang-undang menghendaki Hakim Bicara membuat dapatan selanjutnya, iaitu sama ada keterangan SD19 tersebut telah menimbulkan keraguan munasabah berhubung punca kematian Si Mati. Perkara ini gagal dilaksanakan oleh Hakim Bicara dan Mahkamah Rayuan dan ini bertentangan dengan prinsip undang-undang dalam kes *Mat v. PP* [1963] 1 MLRH 400. Dihujahkan lagi oleh peguam bahawa telah timbul keraguan yang munasabah dalam isu punca kematian dalam kes ini.



(ii) Perayu pertama dan perayu kedua tidak berniat menyebabkan kecederaan yang dialami oleh Si Mati.

[49] Peguam juga berhujah bahawa perayu pertama dan kedua tidak mempunyai niat untuk menyebabkan kecederaan luka bakar terhadap Si Mati kerana pertamanya, seterika wap bukan suatu senjata yang mematikan (deadly weapon). Ini berbeza dengan seterika besi biasa yang diketahui akan menyebabkan kecederaan teruk jika ditekap pada badan manusia pada suhu yang tinggi. Keduanya, tiada keterangan yang dikemukakan di Mahkamah mengenai tahap suhu seterika wap tersebut ketika kejadian dan akhirnya, perayu pertama dan perayu kedua menangkap seterika wap tersebut hanya sebentar sebanyak 2 kali dan tidak pada bahagian utama badan Si Mati, iaitu di kaki, bahu dan peha Si Mati. Sehubungan itu, elemen niat untuk mencederakan yang perlu ada di bawah s 300(c) Kanun Keseksan tidak dibuktikan oleh pihak pendakwa.

(iii) Kecederaan luka bakar yang dialami oleh Si Mati tidak mencukupi pada lazimnya menyebabkan kematian.

[50] Seterusnya, peguam berhujah bahawa berdasarkan keseluruhan keterangan Dr Salmah (SP6), pihak pendakwaan telah gagal membuktikan bahawa kecederaan luka bakar yang dialami oleh Si Mati pada lazimnya menyebabkan kematian. Saranan ini disahkan oleh saksi pembelaan Dr Rohayu (SD19) yang menjelaskan bahawa luka bakar yang melebihi 30% tidak semestinya menyebabkan kematian walaupun luka bakar tersebut boleh menyebabkan kematian. Justeru itu, pihak pendakwaan dikehendaki gagal membuktikan satu lagi elemen di bawah s 300(c) Kanun Keseksan.

(iv) Kegagalan Mahkamah Tinggi dan Mahkamah Rayuan mempertimbangkan keterangan pembelaan secara objektif.

[51] Dihujahkan seterusnya oleh peguam bahawa Mahkamah Tinggi dan Mahkamah Rayuan telah gagal mempertimbangkan secara objektif keterangan pakar bagi pihak pembelaan, iaitu Dr Rohayu (SD19). Keterangan SD19 ini dikehendaki telah ditolak secara khilaf oleh Mahkamah dengan mengambil kira perkara-perkara yang tidak relevan dan mengambil keterangan SD19 di luar konteks.

(v) Mahkamah tersalah arah berhubung pemakaian niat bersama di bawah s 34 Kanun Keseksan.

[52] Berhubung isu ini, peguam berhujah bahawa fakta yang dikemukakan di Mahkamah tidak menunjukkan perayu pertama dan perayu kedua mempunyai niat bersama dalam melakukan kesalahan yang dikemukakan terhadap mereka. Dihujahkan seterusnya bahawa perayu pertama dan perayu kedua menerima seterika wap pada hari kejadian daripada Mubin Mustaza dan setelah menangkap seterika wap tersebut pada Si Mati, mereka telah keluar dari bilik 4-10 tersebut. Sehubungan itu, dikehendaki perayu pertama dan perayu



kedua tidak mempunyai niat bersama bagi penggunaan selanjutnya seterika wap tersebut pada Si Mati.

Hujahan Peguam Bagi Perayu Ketiga

(i) Kes *prima facie* tidak dibuktikan bagi kesalahan yang dihukum di bawah s 302 Kanun Keseksaan mahupun bagi kesalahan di bawah s 304(a) Kanun yang sama.

[53] Peguam perayu ketiga berhujah bahawa pihak pendakwaan telah gagal membuktikan suatu kes *prima facie* terhadap perayu ketiga bagi kesalahan membunuh yang dihukum di bawah s 302 mahupun kesalahan mematikan orang dengan salah tanpa terjumlah kepada membunuh di bawah s 304(a).

[54] Hujahan ini berlandaskan alasan yang berikut, pertamanya, Hakim Bicara terkhilaf kerana bergantung pada keterangan Muhd Ilham bin Zamri (SP27) apabila memutuskan di akhir kes pendakwaan bahawa terdapat suatu kes *prima facie* bagi kesalahan di bawah s 302 terhadap perayu ketiga dan seterusnya di akhir kes pembelaan, telah mensabitkan perayu bagi kesalahan di bawah s 304(a). Keduanya, Mahkamah Tinggi dan Mahkamah Rayuan terkhilaf apabila, tanpa berhati-hati menerima secara asasnya keterangan SP24 dan SP25. Ketiganya, Mahkamah Tinggi dan Mahkamah Rayuan telah gagal mengambil kira bahawa kegagalan pihak pendakwaan memanggil Mejar Zarizal untuk memberikan keterangan atau ditawarkan kepada pihak pembelaan telah menimbulkan anggapan yang bertentangan terhadap kes pendakwaan di bawah s 114(g) Akta Keterangan 1950. Mejar Zarizal dikatakan telah mengajar SP24 dan SP25 untuk memberikan keterangan yang tidak memihak kepada perayu.

(ii) Hakim Bicara gagal mematuhi s 182A Kanun Tatacara Jenayah apabila gagal mempertimbangkan keterangan Muhammad Alif Farhan bin Aerosni (SD20).

[55] Berhubung isu ini, Peguam perayu ketiga berhujah bahawa keterangan SD20 adalah penting kepada pembelaan perayu ketiga kerana keterangan SD20 bertentangan dengan keterangan SP24 dan SP25 dan keterangan SD20 tersebut mengukuhkan pembelaan perayu ketiga. Sehubungan itu, kegagalan Hakim Bicara dan Mahkamah Rayuan mempertimbangkan keterangan SD20 telah memprejudis perayu ketiga di samping tidak mematuhi peruntukan s 182A Kanun Tatacara Jenayah.

[56] Selain itu, Mahkamah Rayuan diujahkan terkhilaf dari segi fakta apabila menyatakan dalam alasan penghakimannya bahawa perayu ketiga mengaku menangkap badan Si Mati dengan seterika wap sedangkan perayu ketiga tidak pernah membuat pengakuan tersebut.



Hujahan Peguam Perayu Keempat

(i) Mahkamah Rayuan terkhilaf apabila memutuskan kesalahan membunuh yang dihukum di bawah s 302 Kanun keseksaan telah dibuktikan oleh pihak pendakwa.

[57] Peguam perayu keempat, antara lain, berhujah bahawa Mahkamah Rayuan terkhilaf apabila memutuskan kesalahan membunuh yang dihukum di bawah s 302 telah dibuktikan oleh pendakwa. Dihujahkan bahawa pendakwa gagal membuktikan peruntukan s 300(c), iaitu kecederaan yang dialami oleh Si Mati dalam keadaan lazimnya mencukupi untuk menyebabkan kematian, Mahkamah Rayuan dihujahkan juga, terkhilaf apabila menyatakan niat perayu untuk menyebabkan kecederaan yang sebenarnya dialami oleh Si Mati adalah tidak relevan. Dalam kes ini, dihujahkan bahawa perayu tidak berniat untuk menyebabkan luka bakar yang serius terhadap Si Mati. Seterusnya, dihujahkan Si Mati tidak meninggal dunia serta-merta tetapi selepas 10 hari dari tarikh kejadian, Fakta ini perlu diberikan pertimbangan oleh Mahkamah dalam isu sama ada kecederaan yang dialami oleh Si Mati mencukupi dalam keadaan lazim untuk menyebabkan kematian, Pihak pembelaan berhujah bahawa kecederaan berkenaan lazimnya tidak mencukupi untuk menyebabkan kematian.

Hujahan Peguam Perayu Kelima

(i) Hakim Bicara terkhilaf apabila memutuskan terdapat kes *prima facie* bagi kesalahan membunuh yang dihukum di bawah s 302 Kanun Keseksaan dan kemudiannya mensabitkan perayu kelima bagi kesalahan di bawah s 304(a) Kanun yang sama.

[58] Peguam perayu kelima juga membangkitkan isu yang sama seperti isu-isu yang dibangkitkan oleh peguam-peguam sebelum ini iaitu, Mahkamah Tinggi terkhilaf apabila memutuskan terdapat kes *prima facie* terhadap perayu kelima bagi kes bunuh yang dihukum di bawah s 302 dan kemudiannya mensabitkan perayu kelima bagi kesalahan di bawah s 304(a). Peguam perayu berhujah bahawa perayu kelima menangkap seterika wap pada Si Mati hanya sekali atas arahan seseorang. Seterusnya, dihujahkan juga bahawa Hakim Bicara dan Mahkamah Rayuan gagal mengambil tindakan berhati-hati apabila menerima keterangan SP24 dan SP25. Selanjutnya, dihujahkan kegagalan pihak pendakwa memanggil Mejar Zarizal atau ditawarkan kepada pembelaan adalah fatal pada kes pendakwa.

[59] Di samping itu juga, peguam berhujah bahawa Mahkamah Rayuan terkhilaf dari segi fakta dan undang-undang bahawa punca kematian Si Mati disebabkan luka bakar yang serius tanpa memberikan pertimbangan kepada keterangan Dr Rohayu (SD19) dan seterusnya terkhilaf apabila menjatuhkan hukuman gantung sampai mati terhadap perayu kelima sedangkan dalam peruntukan pindaan s 302, perayu boleh dijatuhkan hukuman penjara yang



hukuman minimumnya ialah 30 tahun. Berdasarkan faktor mitigasi yang dikemukakan, dihujahkan perayu kelima tidak sewajarnya dijatuhkan hukuman gantung.

(ii) Hakim Bicara gagal mematuhi s 182A Kanun Tatacara Jenayah apabila gagal mempertimbangkan keterangan SP25 yang memihak kepada perayu kelima.

[60] Berhubung isu ini peguam berhujah bahawa kegagalan Hakim Bicara mengambil kira keterangan SP25 yang menyatakan perayu kelima hanya menangkap Si Mati dengan seterika wap hanya sekali dan atas arahan menyebabkan peruntukan s 182A tidak dipatuhi dan memprejudis perayu kelima.

Hujahan Peguam Abdoul Hakeem Yang Dituduh Bagi Kesalahan Bersubahat Membunuh Si Mati

(i) Elemen persubahatan gagal dibuktikan oleh pihak pendakwaan

[61] Peguam perayu antara lain berhujah bahawa elemen persubahatan telah gagal dibuktikan oleh pendakwaan melampaui keraguan yang munasabah di samping perbuatan persubahatan yang tepat tidak dinyatakan dalam pertuduhan terhadap perayu. Ini telah memprejudiskan perayu.

(ii) Hakim Bicara dan Mahkamah Rayuan gagal mengambil kira bahawa terdapat rawatan dan pemberian ubat kepada Si Mati sehari sebelum kematian Si Mati.

[62] Berhubung isu ini peguam berhujah bahawa Si Mati telah diberikan ubatan oleh SP7 sehari sebelum Si Mati meninggal dunia. Ubatan yang diberikan tersebut boleh membawa kesan alahan kepada Si Mati iaitu Si Mati boleh mengalami Steven Johnson Syndrome. Dalam kes ini, SP7 telah mengesahkan ada memberikan dua suntikan Voltaren dan Maxolon yang mempunyai kesan alahan atau mengakibatkan Steven Johnson Syndrome kepada penerimanya. Perkara ini tidak dipertimbangkan oleh Hakim Bicara dan Mahkamah Rayuan dalam memutuskan punca kematian Si Mati. Dihujahkan seterusnya bahawa campur tangan perubatan oleh SP7 sehari sebelum kematian Si Mati merupakan faktor yang penting yang gagal dipertimbangkan oleh Hakim Bicara dan Mahkamah Rayuan.

Analisis Dan Keputusan Mahkamah Ini

[63] Perayu pertama hingga perayu kelima dalam kes ini telah disabitkan dengan kesalahan membunuh Si Mati dan perayu Abdoul Hakeem pula telah disabitkan dengan kesalahan bersubahat untuk membunuh Si Mati oleh Mahkamah Rayuan. Pertuduhan yang dikemukakan terhadap perayu-perayu semasa perbicaraan adalah sebagaimana yang berikut.



Pertuduhan Terhadap Perayu Pertama Hingga Perayu Kelima

“Bahawa kamu bersama-sama pada 22 Mei 2017 jam lebih kurang 4.45 pagi hingga 5.45 pagi bertempat di dalam bilik 04-10 Blok Penginapan Asrama Jebat, Universiti Pertahanan Nasional Malaysia (UPNM), Kem Perdana Sungai Besi, dalam daerah Cheras, dalam & Wilayah Persekutuan Kuala Lumpur, dalam mencapai niat bersama telah melakukan bunuh dengan menyebabkan kematian terhadap Zulfarhan Osman bin Zulkarnain, No Kad Pengenalan: 961129-016517, dan oleh yang demikian kamu telah melakukan suatu kesalahan yang boleh dihukum di bawah s 302 Kanun Keseksaan dibaca bersama s 34 Kanun yang sama.”

Pertuduhan Terhadap Perayu Abdoul Hakeem Bin Mohd Ali

“Bahawa kamu pada 22 Mei 2017 jam lebih kurang 4.45 pagi hingga 5.45 pagi bertempat di dalam bilik 04-10, Blok Penginapan Asrama Jebat, Universiti Pertahanan Nasional Malaysia (UPNM), Kem Perdana Sungai Besi, dalam daerah Cheras, dalam Wilayah Persekutuan Kuala Lumpur, telah bersubahat dengan Muhammad Akmal Zuhairi bin Azmal (No. Kpt: 960609-11-5137), Muhammad Azamuddin bin Mad Sofi (No. Kpt: 960704-08-5451), Muhammad Najib bin Mohd Razi (No. Kpt: 960108-08-5455), Muhammad Afif Najmudin bin Azahat (No. Kpt: 960410-05-5389), Mohamad Shobirin bin Sabri (No. Kpt: 96034-08-6439) untuk melakukan pembunuhan terhadap Zulfarhan Osman bin Zulkarnain (No Kad Pengenalan: 961129-01-6517) di mana kesalahan tersebut telah dilakukan akibat persubahatan kamu dan oleh itu kamu telah melakukan suatu kesalahan yang boleh dihukum di bawah s 109 Kanun Keseksaan yang dibaca bersama s 302 Kanun yang sama.”

[64] Berhubung dengan kesalahan membunuh yang boleh dihukum di bawah s 302 Kanun Keseksaan, undang-undang adalah jelas bahawa pihak pendakwaan perlu membuktikan melampaui keraguan yang munasabah salah satu daripada cabang peruntukan s 300 Kanun Keseksaan yang menyatakan:

300. Membunuh orang.

Kecuali dalam hal-hal yang dikecualikan kemudian daripada ini, mematikan orang dengan salah ialah membunuh orang-

- (a) jika perbuatan yang menyebabkan kematian itu dilakukan dengan niat hendak menyebabkan kematian;
- (b) jika perbuatan itu dilakukan dengan niat hendak menyebabkan sesuatu bencana tubuh yang pesalah itu ketahui mungkin menyebabkan kematian orang yang dikenakan bencana itu;
- (c) **jika perbuatan itu dilakukan dengan niat hendak menyebabkan bencana tubuh kepada seseorang, dan bencana tubuh yang dimaksud hendak dikenakan itu adalah cukup, pada lazimnya, untuk menyebabkan kematian;** atau
- (d) jika orang yang melakukan perbuatan itu ketahui bahawa perbuatan itu adalah sebegitu sekali berbahaya hingga mungkin sekali menyebabkan kematian, atau sesuatu bencana tubuh yang mungkin



menyebabkan kematian, dan ia melakukan perbuatan itu dengan tiada apa-apa sebab bagi mendatangkan bahaya menyebabkan kematian, atau bencana sebagaimana tersebut itu.

[Penekanan Diberikan]

[65] Seksyen 302 Kanun Keseksaan pula menyatakan seperti yang berikut;

302. Barang siapa melakukan kesalahan membunuh orang hendaklah dihukum mati atau penjara tidak kurang dari 30 tahun dan tidak lebih dari 40 tahun dan jika tidak dihukum mati hendaklah dihukum dengan sebatan tidak kurang dari 12 sebatan.

[66] Seksyen 300 Kanun Keseksaan mengariskan bahawa sesuatu perbuatan mematikan orang dengan salah ialah suatu kesalahan membunuh sekiranya salah satu cabang di bawah s 300 ini dapat dibuktikan oleh pihak pendakwaan iaitu sama ada cabang s 300(a), 300(b), 300(c) atau 300(d) seperti yang dinyatakan di atas. Tahap pembuktian setiap cabang ini adalah pada tahap melampaui keraguan yang munasabah (lihat juga kes *Tham Kai Yau & Ors v. PP* [1976] 1 MLRA 279).

[67] Dalam kes terhadap perayu-perayu di Mahkamah ini, pihak pendakwaan bersandar pada cabang 300(c) untuk membuktikan kesalahan bunuh terhadap perayu-perayu. Mahkamah Rayuan, seperti dinyatakan terdahulu, telah memutuskan bahawa peruntukan s 300(c) ini telah berjaya dibuktikan oleh pihak pendakwaan dan mensabitkan perayu pertama hingga perayu kelima dengan kesalahan membunuh yang boleh dihukum di bawah s 302 dan perayu Abdoul Hakeem bagi kesalahan bersubahat membunuh, iaitu kesalahan di bawah s 109 Kanun Keseksaan dibaca bersama s 302 Kanun yang sama.

[68] Bagi memudahkan pemahaman, s 300(c) dipamerkan semula di bawah:

(c) jika perbuatan itu dilakukan dengan **niat hendak menyebabkan bencana tubuh kepada seseorang**, dan bencana tubuh yang dimaksud hendak dikenakan itu **adalah cukup, pada lazimnya, untuk menvebakkan kematian**.

[Penekanan Diberikan]

[69] Berhubung pembuktian s 300(c) ini, pihak pendakwaan mesti membuktikan melampaui keraguan yang munasabah tiga elemen berikut:

- (i) Terdapat bencana tubuh atau kecederaan pada Si Mati;
- (ii) Tertuduh berniat untuk menyebabkan bencana tubuh atau kecederaan tersebut;
- (iii) Bencana tubuh atau kecederaan tersebut mencukupi pada lazimnya untuk menyebabkan kematian.



(Lihat *PP v. Muhammad Khairuanuar Baharuddin & Another Appeal* [2025] 1 MLRA 65; *PP v. Sanderasegaran Nithenantham* [2024] 3 MLRA 798; *Zulkipl Mohamad v. PP* [2022] 2 MLRA 70; *Mohamed Yassin Hussin v. PP* [1976] 1 MLRA 603; *Virsa Singh v. State Of Punjab (Crl)* 579; dan *Tan Cheow Bock v. PP* [1991] 1 MLRA 746; *PP v. Visuvanathan* [1977] 1 MLRH 14).

Sama Ada Terdapat Bencana Tubuh Atau Kecederaan Pada Si Mati

[70] Terdapatnya bencana tubuh (kecederaan) pada badan Si Mati yang tidak dipertikaikan oleh pihak pembelaan. Keterangan Dr Salmah (SP6) dan laporan bedah siasat yang dikemukakan di Mahkamah jelas menunjukkan adanya kecederaan luka bakar pada badan Si Mati dan menurut SP6 lagi, terdapat 90 luka bakar yang meliputi 80% badan Si Mati. Adanya kecederaan pada badan Si Mati ini juga sebelum itu, disahkan oleh Dr Azfar bin Hussin (SP7), pegawai perubatan Klinik As-Salam, yang merawat Si Mati pada 27 Mei 2017 dan 31 Mei 2017. SP7 telah melakukan “dressing” pada luka-luka yang dialami oleh Si Mati itu dan memberikan ubat-ubatan yang berkaitan. Sehubungan itu, elemen pertama ini telah dibuktikan oleh pihak pendakwaan.

Sama Ada Perayu Pertama Hingga Kelima Berniat Untuk Menyebabkan Kecederaan Pada Badan Si Mati Tersebut

[71] Berhubung isu ini, niat seseorang itu merupakan suatu persoalan fakta yang pastinya tidak dapat dibuktikan melalui keterangan langsung. Pembuktian niat ini perlu diteliti melalui inferens daripada perbuatan perayu dan keadaan sekeliling yang relevan. Ini dijelaskan juga oleh Thomson H dalam kes *Chan Pean Leon v. PP* [1956] 1 MLRH 44 seperti berikut:

“Intention is a matter of fact which in the nature of things cannot be proved by direct evidence. It can only be proved by inference from the surrounding circumstances. Whether these surrounding circumstances make out such intention is a question of fact in each individual case.”

[72] Selanjutnya dalam buku Ratanlal & Dhirajlal, *The Indian Penal Code*, 32nd Edn, di ms 1274, isu niat ini telah dikupas dan dijelaskan seperti yang berikut:

“**Intention how to be deduced — The intention is a question of fact which is to be gathered from the acts of the parties.** The Law books as regards intention to the natural result of a man’s act, and not to the condition of his mind. So, when a normal man does an act, he should be credited with the intention of doing that which is inevitable consequence of his act. Further, **the nature of intention has to be gathered from various circumstances**, for instance, the kind of weapon used, the part of the body hit, the amount of force employed and the circumstances attending upon death.”

[Penekanan Diberikan]

[73] Dalam kes ini, kecederaan yang dialami oleh Si Mati antara lain ialah luka bakar yang banyak jumlahnya pada badan Si Mati. Keterangan langsung terutamanya daripada SP24 dan SP25 mengesahkan bahawa perayu pertama hingga perayu kelima ada menangkap badan Si Mati dengan seterika wap



di bilik 4-10, Asrama Jebat, UPNM pada 22 Mei 2017. Si Mati dibawa ke bilik 4-10 tersebut untuk disoal siasat berhubung kehilangan komputer riba perayu pertama untuk mendapatkan pengakuan Si Mati. Walaupun Si Mati tidak mengaku mencuri komputer riba berkenaan apabila disoal siasat dan dipukul sehari sebelum itu, iaitu pada 21 Mei 2017 di bilik 3-05, Si Mati masih terus disoal siasat, dipukul dan ditekak dengan seterika wap pada 22 Mei 2017 di bilik 4-10 berkenaan untuk mendapatkan pengakuan Si Mati. Di sini, keterangan bahawa SP13, seorang yang dikatakan mengamalkan perubahan Islam dan menyatakan bahawa Si Mati ada mengambil komputer riba dan kemudiannya maklumat ini disampaikan kepada perayu pertama oleh anak SP13, iaitu Muhammad Ashraf bin Abdullah (SD18), membolehkan inferens yang munasabah dibuat tentang sebab mengapa Si Mati disoal siasat secara berterusan pada kedua-dua tarikh yang dinyatakan. Matlamat utama Si Mati dipukul dan seterusnya ditekak dengan seterika wap ini adalah untuk mendapatkan pengakuan Si Mati bahawa dia yang mencuri komputer riba tersebut sejajar dengan maklumat yang diterima daripada SP13. Selain itu, selepas kejadian, Si Mati telah dikawal dan dipindahkan ke beberapa tempat untuk mengelakkan daripada diketahui oleh pihak UPNM. Si Mati juga tidak dibawa ke hospital tetapi cuba dirawat sendiri oleh mereka dan akhirnya dirawat di Klinik As-Salam di Bangi.

[74] Sehubungan itu, apabila diteliti, perbuatan perayu pertama hingga perayu kelima yang menangkap Si Mati dengan seterika wap pada 22 Mei 2017 di bilik 4-10 tersebut dan keadaan sekeliling yang berkaitan, inferens yang munasabah yang boleh dibuat ialah perayu-perayu tersebut mempunyai niat untuk menyebabkan kecederaan pada Si Mati.

[75] Hakim Bicara juga telah membuat dapatan fakta bahawa SP24 dan SP25 ialah saksi yang boleh dipercayai dan tiada alasan kukuh untuk Mahkamah ini mengganggu dapatan tersebut memandangkan Hakim Bicara mempunyai kelebihan audio-visual terhadap saksi-saksi berkenaan di samping meneliti perilaku (*demeanour*) saksi-saksi tersebut. (Lihat *PP v. Muhammad Khairuanuar Baharuddin & Another Appeal* [2025] 1 MLRA 65; *Tan Kim Ho & Anor v. PP* [2009] 5 MLRA 612; *Lee Ah Seng & Anor v. PP* [2007] 1 MLRA 784; *Pendakwa Raya lwn. Mohd Noor Affendi Zaukifli* [2025] 2 MLRA 903 dan *Abu Bakar Mohd Yusof lwn. PP* [2025] 2 MLRA 431)

[76] Berhubung dengan isu ini juga, dinyatakan di sini bahawa Hakim Bicara tidak perlu menentukan apakah kecederaan sebenarnya yang diniatkan oleh perayu pertama hingga perayu kelima terhadap Si Mati. Apa yang penting ialah tindakan perayu-perayu menangkap seterika wap pada Si Mati bukan dilakukan secara tidak sengaja tetapi bertujuan atau berniat mendatangkan kecederaan kepada Si Mati. Sukar untuk diterima oleh Mahkamah bahawa perbuatan menangkap seterika wap pada badan Si Mati bukannya dengan niat untuk mendatangkan kecederaan, apatah lagi Si Mati telah menjerit dan menggelupur apabila ditekak dengan seterika wap tersebut. Tambahan pula, terdapat 90 tekapan luka bakar pada badan Si Mati.



[77] Dalam kes *PP v. Visuvanathan* [1977] 1 MLRH 14, isu berbangkit ini ada dijelaskan seperti yang berikut:

“It is irrelevant and totally unnecessary to enquire what kind of injury the accused intended to inflict. The crucial question always is, was the injury found to be present intended or accidental. As was observed by Bose J. in Virsa Singh’s case. *supra* at p 476 -

“It does not matter that there was no intention...to cause injury of a kind that is sufficient to cause death in the ordinary cause of nature.”

And at p 478 -

“.. the question, so far as the intention is concerned, is not whether he intended to inflict the injury in question.”

[Penekanan Diberikan]

[78] Selanjutnya, dalam kes yang sama, dinyatakan:

“At page 158, Lord Diplock states: -

“To establish that an offence had been committed under s 300(c), or under s 299, it would not have been necessary for the trial judge in the instant case to enter an inquiry whether the appellant intended to cause the precise injuries which in fact resultant or had sufficient knowledge of anatomy to know that the internal injury which might result from his act would take the form of fracture of the ribs, followed by cardiac arrest. As was said by the Supreme Court of India when dealing with the identical provisions of the Indian Penal Code in *Virsa Singh v. State of Punjab* at p 467:-

“That is not the kind of enquiry. It is broad based and simple and based on common sense.”

It was however essential for the prosecution to prove, at very least, that the appellant did intend by sitting on the victim’s chest to inflict upon her some internal, as distinct from mere superficial, injuries or temporary pain..”

[Penekanan Diberikan]

[79] Dalam buku yang sama Ratanlal dan Dhirajlal, *The Indian Penal Code*, 32nd Edn ms 1274, ini dinyatakan:

“In the absence of any indication or circumstances to show that the particular injury inflicted by the accused was accidental or unintentional or that some other kind of injury was intended to be inflicted, the presumption would be that the very injury suffered by the deceased was intended. Mere absence of premeditation will not be enough to displace this presumption. The question whether the offender entertained a particular type of intention or not is the question which is to be answered not from any direct evidence but from the proved facts and circumstances of the case.

[Penekanan Diberikan]



[80] Prinsip undang-undang ini juga diterima pakai oleh Mahkamah ini dalam kes *Zulkiple Mohamad v. PP* [2022] 2 MLRA 70, di mana di perenggan-perenggan [30] dan [31] dinyatakan:

“[30] In *Tan Cheow Bock v. Public Prosecutor* [1991] 1 MLRA 746, however, the Court of Appeal of Singapore, which is the apex court in the Republic, did not quite agree with this part of Lord Diplock’s pronouncement, agreeing instead with the opinion of the Singapore High Court in *PP v. Visuvanathan* [1977] 1 MLRH 14, that it was “not of universal application”. We reproduce below what Yong Pung How CJ said at p 618:

Mohamed Yassin’s case was discussed in *PP v. Visuvanathan* [1977] 1 MLRH 14. In *Visuvanathan’s* case, the trial judges were of the opinion that the dictum of Lord Diplock relied upon was factually appropriate in *Mohamed Yassin’s* case but it was not of universal application. **The trial judges in *Visuvanathan’s* case expressed the view that all the Prosecution needed to prove was that where the appellant intentionally (and not accidentally) inflicted a bodily injury sufficient in the ordinary course of nature to cause death, cl. (c) would apply. Under cl. (c), once that intention to cause bodily injury was actually found to be proved, the rest of the enquiry ceased to be subjective and became purely objective, and the only question was: whether the injury was sufficient in the ordinary course of nature to cause death. “It is irrelevant and totally unnecessary to enquire what kind of injury the accused intended to inflict. The crucial question always is, was the injury found to be present intended or accidental.”**

[31] The learned Chief Justice went on to say: in our opinion, the law is not in doubt. *Virsa Singh’s* case ([28] *supra*) is clear on s 300(c). V Bose J delivering the judgment of the Supreme Court said, at 467:

In considering whether the intention was to inflict the injury found to have been inflicted, the enquiry necessarily proceeds on the broad lines as, for example, whether there was an intention to strike at a vital or a dangerous spot and whether with sufficient force to cause the kind of injury found to have been inflicted. It is, of course, not necessary to enquire into every last detail as, for example, whether the prisoner intended to have the bowels fall out, or whether he intended to penetrate the liver or the kidneys or the heart. Otherwise a man who has no knowledge of anatomy could never be convicted, for, if he does not know that there is a heart or kidney or bowels, he cannot be said to have intended to injure them. Of course, that is not the kind of enquiry. It is broad-based and simple and based on common sense: the kind of enquiry that ‘twelve good men and true’ could readily appreciate and understand.

To put it shortly, the prosecution must prove the following facts before it can bring a case under s 300 ‘thirdly’: First, it must establish, quite objectively, that a bodily injury is present. Secondly, the nature of the injury must be proved. These are purely objective investigations. Thirdly, it must be proved that there was an intention to inflict that particular bodily injury, that is to say, that it was not accidental or unintentional, or that



some other kind of injury was intended. Once these three elements are proved to be present, the enquiry proceeds further and, fourthly, it must be proved that the injury of the type just described made up of the three elements set out above is sufficient to cause death in the ordinary course of nature. This part of the enquiry is purely objective and inferential and has nothing to do with the intention of the offender.”

[Penekanan Diberikan]

[81] Seterusnya, dalam kes yang sama dijelaskan seperti yang berikut;

“[46] **The law is now settled that It IS Irrelevant and totally unnecessary to enquire Into what kind of Injury the accused Intended to Inflict.** As Vivian Bose J said in *Virsa Singh*, the question is not whether the accused’s intention is to inflict a serious injury or a trivial one but whether he intended to inflict the injury that is proved to be present. In the present case, the injuries that were proved to be present and which the appellant intended to inflict were the injuries on the deceased’s head which fractured her skull. ”

[Penekanan Diberikan]

[82] Justeru itu juga, tidak menjadi keperluan untuk Mahkamah menentukan apakah jenis kecederaan yang diniatkan oleh perayu pertama hingga perayu kelima terhadap Si Mati. Apa yang perlu dibuktikan ialah perayu pertama hingga perayu kelima berniat mendatangkan kecederaan pada Si Mati dengan penggunaan seterika wap terhadap Si Mati pada hari kejadian.

[83] Selain itu, kecederaan luka bakar akibat penggunaan seterika wap pada Si Mati bukan sesuatu yang langsung di luar jangkaan perayu-perayu. Penggunaan seterika wap pada Si Mati lebih kurang 90 kali dan jeritan serta raungan Si Mati semasa ditekup dengan seterika wap tersebut pasti dalam pengetahuan perayu-perayu bahawa seterika tersebut amat panas dan mendatangkan kecederaan yang serius seperti luka bakar yang dialami oleh Si Mati. Perayu-perayu tidak boleh selepas itu menyatakan bahawa mereka tidak mengetahui kesan tindakan menepak seterika wap tersebut pada Si Mati akan membawa kepada luka bakar. Ini sesuatu yang di luar pemikiran akal manusia biasa.

[84] Jelasnya di sini, elemen kedua ini juga telah dibuktikan oleh pihak pendakwaan.

Sama Ada Kecederaan Terhadap Si Mati Tersebut Mencukupi, Pada Lazimnya, Untuk Menyebabkan Kematian

[85] Seterusnya, salah satu elemen yang penting dalam pembuktian s 300(c) ialah kecederaan luka-luka bakar yang dialami oleh Si Mati adalah mencukupi, pada lazimnya, untuk menyebabkan kematian. Penekanan di sini adalah pada frasa “lazimnya untuk menyebabkan kematian” (in the ordinary course of nature to cause death).



[86] Kamus Dewan Perdana oleh Dewan Bahasa dan Pustaka di ms 1269, mentafsirkan makna perkataan “lazim” sebagai “biasa” atau “selalu”. Di sini, perkataan “lazimnya” untuk menyebabkan kematian membawa maksud kebiasaannya atau selalunya membawa kematian. Sehubungan itu, pihak pendakwaan mesti membuktikan melampaui keraguan yang munasabah bahawa kecederaan luka-luka bakar yang dialami oleh Si Mati adalah mencukupi pada kebiasaannya atau selalunya untuk menyebabkan kematian.

[87] Maksud frasa ‘mencukupi pada lazimnya menyebabkan kematian’ atau dalam Bahasa Inggerisnya, ‘sufficient in ordinary course of nature to cause death’ ada dijelaskan dalam kes *State Of AP v. Rayavarapu Punmaya And Another* [1977] AIR (SC) 45 seperti yang berikut:

“16. In clause 3 of s 300, instead of the words likely to cause death occurring in the corresponding clause (b) of s 299, the words “sufficient in the ordinary course of nature” have been used. Obviously, the distinction lies between a bodily injury likely to cause death and a bodily injury sufficient in the ordinary course of nature to cause death. The distinction is fine but real and if overlooked, may result in miscarriage of justice. The difference between clause (b) of s 299 and clause (3) of s 300 is one of the degree of probability of death resulting from the intended bodily injury. To put it more broadly, it is the degree of probability of death which determines whether a culpable homicide is of the gravest, medium or the lowest degree. The word “likely” in clause (b) of s 299 conveys the sense of probable as distinguished from a mere possibility. **The words “bodily injury...sufficient in the ordinary course of nature to cause death” mean that death will be “most probable” result of the injury, having regard to the ordinary course of nature.”**

[Penekanan Diberikan]

[88] Selanjutnya, maksud “sufficient” di bawah s 300(c) yang dinyatakan di atas telah juga disentuh dalam kes *Zulkipl Mohamad* di mana dinyatakan:

“[34] In another Singapore Court of Appeal decision, it was held in *Wang Wenfeng v. PP* [2012] SGCA 47 that if the bodily injury intentionally inflicted was sufficient in the ordinary course of nature to cause death, s 300(c) murder would have been committed “as a matter of course”. Chan Sek Keong CJ speaking for the court also touched on the issue of “sufficiency” at p 602:

33. **“Sufficiency” in this context refers to the high probability of death in the ordinary course of nature (*Rajwant Singh v. State Of Kerala* AIR [1966] SC 1874 at 1879). The test of whether a bodily injury is sufficient in the ordinary course of nature to cause death is objective — it is not necessary for the accused to have known or intended the potentially fatal consequence of inflicting the bodily injury. It is sufficient that the accused intentionally caused the particular bodily injury inflicted (*Tan Chee Wee* at [42]-[43]). Hence, a fatal act accidentally caused is a defence to a charge of s 300(c) murder.”**

[Penekanan Diberikan]



[89] Kembali kepada kes ini, isu sama ada kecederaan luka bakar yang dialami oleh Si Mati pada lazimnya adalah mencukupi untuk menyebabkan kematian merupakan suatu persoalan fakta yang perlu ditentukan oleh Mahkamah. Dalam membuat dapatan fakta ini Mahkamah perlu mempertimbangkan segala keterangan yang relevan terutamanya keterangan forensik dan perubatan seperti keterangan pakar yang melakukan bedah siasat terhadap Si Mati dan laporan bedah siasat serta keterangan pakar lain dalam bidang ini. Keterangan pakar-pakar ini amat penting dalam membantu Mahkamah menentukan isu sama ada kecederaan luka bakar tersebut pada lazimnya adalah mencukupi untuk menyebabkan kematian kepada Si Mati. Mahkamah juga perlu meneliti keterangan lain yang relevan seperti keterangan saksi-saksi selepas kejadian Si Mati ditekap dengan seterika wap berkenaan yang boleh menunjukkan keadaan Si Mati setelah mengalami kecederaan berkenaan. (Lihat *PP v. Muhammad Khairuanuar Baharuddin & Another Appeal* [2025] 1 MLRA 65; *PP v. Sanderasegaran Nithenantham* [2024] 3 MLRA 798; dan *Zulkiple Mohamad v. PP* [2022] 2 MLRA 70).

[90] Dinyatakan di sini juga keterangan pakar tidak sama sekali mengikat Hakim Bicara dalam membuat dapatan fakta berhubung isu ini tetapi akan membantu Hakim Bicara membuat dapatan fakta berkenaan dan dalam kes ini sama ada kecederaan pada Si Mati pada lazimnya adalah mencukupi untuk menyebabkan kematian. Keterangan pakar in boleh diterima di bawah s 45 Akta Keterangan 1950.

[91] Berhubung isu yang sama, adalah sesuai dirujuk kembali prinsip penerimaan keterangan saksi pakar yang telah dijelaskan oleh Raja Azlan Shah KHN (ketika itu) dalam kes *Wong Swee Chin v. PP* [1980] 1 MLRA 125, iaitu seperti yang berikut:

“In the Evidence Act 1950, opinion of experts are under certain conditions admissible in evidence. Who are experts are explained in s45 of the Act. Section 46 provides that facts not otherwise relevant are relevant if they support or are inconsistent with the opinions of experts when such opinions are relevant. DW2 was called as an expert witness. Our system of jurisprudence does not, generally speaking, remit the determination of dispute to experts. Some questions are left to the robust good sense of a jury. Others are resolved by the conventional wisdom of a judge sitting alone. In the course of elucidating disputed questions, aids in the form of expert opinions are in appropriate cases placed before juries and judges. **But, except on purely scientific issues, expert evidence is to be used by the court for the purpose of assisting rather than compelling the formulation of the ultimate judgments. In the ultimate analysis, it is the tribunal of fact, whether it be a judge or jury, which is required to weigh all the evidence and determine the probabilities. It cannot transfer this task to the expert witness, the court must come to its own opinion.**”

[Penekanan Diberikan]



[92] Dalam kes ini, di peringkat kes pendakwaan, Dr Salmah (SP6) yang melakukan bedah siasat terhadap Si Mati telah memberikan keterangan, antara lainnya, berhubung kecederaan luka-luka bakar yang dialami oleh Si Mati. Luka-luka bakar tersebut juga telah diperincikan dalam laporan bedah siasat yang dikemukakan di Mahkamah. SP6 kemudiannya membuat kesimpulan bahawa punca kematian Si Mati ialah luka bakar (severe burn).

[93] Semasa pemeriksaan utama, apabila menjawab soalan Timbalan Pendakwa Raya, SP6 mengesahkan bahawa kesan lecur daripada luka bakar pada Si Mati lazimnya adalah mencukupi untuk menyebabkan kematian. Dalam keterangannya, SP6 menyatakan:

“TPR: Dalam keterangan Doktor sebelum ini, setelah Doktor membuat pemeriksaan ke atas mayat tersebut, Doktor memutuskan bahawa sebab kematian adalah luka bakar atau severe burn?

SP6: Ya.

TPR: Adakah kesan lecur itu **lazimnya mencukupi untuk menyebabkan kematian?**

SP6: Ya.”

[Penekanan Diberikan]

[94] Walau bagaimanapun, semasa diperiksa balas oleh peguam, ini jawapan yang diberikan oleh SP6:

“**Soalan:** Memandangkan Doktor bersetuju dengan journal yang mengatakan kesan kebakaran second and third degree even though more than 50% tidak secara automatik mengakibatkan kematian, jadi sekarang saya ingin merujuk semula pada witness statement tersebut, dalam witness statement Doktor katakan berdasarkan kepada journal dan buku teks perubatan, luka lecur yang melebihi 30% dan 50% TBSA boleh menyebabkan kematian walaupun dengan rawatan, **adakah Doktor setuju dengan saya kalau saya katakan yang setepatnya statement adalah berdasarkan journal dan buku teks perubatan luka lecur yang melebihi 30% dan 50% boleh tetapi tidak selalunya dan semestinya menyebabkan kematian, adakah itu adalah statement yang lebih betul?**

Jawapan: Yes.

Soalan: Adakah **lebih tepat** jika dikatakan whether the person **who dies based on the burn injury dependent primarily on the first medical treatment that was given** to the said patient?

Jawapan: Ya.”

[Penekanan Diberikan]



[95] Seterusnya, semasa pemeriksaan balas juga SP6 memberikan keterangan seperti yang berikut:

Soalan: To say, kelazimannya kesan bakar akan terus menyebabkan kematian tidak tepat?

Jawapan: Only severe **boleh** menyebabkan kematian.

Soalan: Severe burn **boleh tetapi tidak semestinya atau selalunya menyebabkan kematian** kalau diberikan rawatan yang cepat dan sepatutnya?

Jawapan: **Betul**, tapi statement saya menyatakan 30% hingga 50% permukaan boleh menyebabkan kematian, itu statement saya, dengan rawatan pun boleh menyebabkan kematian.

[Penekanan Diberikan]

[96] Semasa pemeriksaan balas ini dan berdasarkan keterangan yang dinyatakan di atas. SP6 mengesahkan pula bahawa setepatnya, luka lecur yang melebihi 30% dan 50% boleh tetapi tidak selalunya atau semestinya menyebabkan kematian. Ini merangkumi peratusan kecederaan luka bakar pada Si Mati yang dinyatakan oleh SP6, iaitu sebanyak 80% badan Si Mati. Sehubungan itu, keterangan SP6 semasa pemeriksaan utama yang mengesahkan bahawa kecederaan luka lecur pada badan Si Mati lazimnya adalah mencukupi untuk menyebabkan kematian telah bercanggah dengan keterangan SP6 semasa diperiksa balas. Lebih-lebih lagi, SP6 mengesahkan semasa diperiksa balas itu, bahawa setepatnya, luka bakar berkenaan tidak selalunya atau semestinya menyebabkan kematian tetapi boleh menyebabkan kematian.

[97] Pihak pendakwaan langsung tidak menyentuh perkara ini atau mendapatkan penjelasan lanjut daripada SP6 semasa pemeriksaan semula. Sehubungan itu, keterangan SP6 semasa diperiksa balas tersebut berdiri utuh tanpa cabaran di peringkat pemeriksaan semula.

[98] Berdasarkan maksud perkataan “lazimnya” seperti yang telah dihuraikan terdahulu, perkataan ‘boleh’ tidak mempunyai maksud yang sama atau bermaksud ‘lazimnya’. Perkataan ‘boleh’ dan ‘lazimnya’ membawa maksud yang jauh berbeza. Kamus Dewan Perdana oleh Dewan Bahasa dan Pustaka telah mendefinisikan perkataan ‘boleh’ di ms 311, sebagai ‘berupaya untuk’ atau ‘mampu untuk’ dan perkataan ‘boleh jadi’ didefinisikan di ms 312 sebagai ‘mungkin benar berlaku’, ‘belum diketahui atau belum dapat dipastikan’.

[99] Kesimpulannya, keterangan pakar SP6 yang jelas di Mahkamah pada peringkat pendakwaan ini ialah kesan luka bakar pada Si Mati hanya boleh menyebabkan kematian. Di sini, elemen utama iaitu kecederaan pada Si Mati tersebut pada lazimnya adalah mencukupi untuk menyebabkan kematian yang dinyatakan semasa pemeriksaan utama telah gagal dipertahankan semasa diperiksa balas sehingga SP6 selesai memberikan keterangannya.



[100] Seterusnya, keterangan Dr Azfar bin Hussin (SP7) juga perlu diberikan perhatian dalam isu ini. SP7 telah merawat Si Mati pada 27 Mei 2017 dan 31 Mei 2017 di Klinik As-Salam Bangi. Pada 27 Mei 2017 iaitu 5 hari selepas kejadian, hasil pemeriksaan SP7 mendapati 'vital sign' Si Mati adalah dalam keadaan stabil, iaitu tekanan darahnya 118/78, degupan jantungnya ialah 100 degupan setiap minit, oksigennya 100% dan suhu badannya 36.5 darjah. Begitu juga pada 31 Mei 2017, keadaan 'vital sign' Si Mati adalah biasa sahaja iaitu dengan tekanan darah 110/70, 98 degupan jantung seminit, tahap oksigen 99% dan suhu badan 36 darjah. Keterangan SP7 ini tidak membantu untuk menunjukkan kecederaan yang dialami Si Mati lazimnya adalah mencukupi untuk menyebabkan kematian malahan sebaliknya.

[101] Di sini tidak dipertikaikan bahawa kecederaan luka bakar pada Si Mati boleh membawa kematian tetapi berdasarkan keterangan pada peringkat pendakwaan ini sahaja, tidak dapat membuktikan bahawa kecederaan tersebut pada lazimnya adalah mencukupi untuk menyebabkan kematian Si Mati.

[102] Pihak pendakwaan yang berhujah bahawa pihak pendakwaan telah membuktikan elemen s 300(c) tersebut ada mengemukakan satu kes Mahkamah Agung di India, *Sudershan Kumar v. State Of Delhi* [1974] AIR (SC) 2328 yang melibatkan kes tertuduh mencurahkan asid pada Si Mati. Si Mati kemudian mengalami toxaemia dan jangkitan daripada kesan bakar akibat curahan asid tersebut. Bagaimanapun, Si Mati meninggal dunia 12 hari dari tarikh dia dicurahkan asid oleh tertuduh. Mahkamah Bicara dalam kes tersebut telah mensabitkan tertuduh bagi kesalahan membunuh yang dihukum di bawah s 302 Indian Penal Code dan keputusan ini disahkan oleh Mahkamah Agung. Dalam kes tersebut, pakar yang merawat Si Mati, Dr V.K. Jain, memberikan keterangan bahawa kecederaan Si Mati pada lazimnya adalah mencukupi untuk menyebabkan kematian dan keterangan ini disokong oleh seorang lagi pakar, iaitu Dr K.S. Kumar. Keterangan pakar-pakar ini tidak dicabar semasa perbicaraan.

[103] Berbeza dengan kes ini, keterangan pakar SP6 pada peringkat pendakwaan sendiri telah tercabar semasa diperiksa-balas oleh peguam dengan pengesahan yang dibuat oleh SP6 bahawa kecederaan pada Si Mati tidak selalunya atau semestinya menyebabkan kematian. Penggunaan frasa "boleh menyebabkan kematian" atau "peluang hidup Si Mati adalah tipis" tidak dapat melunturkan pernyataan SP6 bahawa kecederaan tersebut tidak selalunya atau semestinya menyebabkan kematian. Penggunaan perkataan 'boleh' hanya merupakan suatu kemungkinan sahaja dan ianya tidak semestinya terjadi.

[104] Sehubungan itu, salah satu elemen penting s 300(c) telah gagal dibuktikan oleh pihak pendakwaan. Justeru itu juga, Mahkamah Tinggi di akhir kes pendakwaan tidak sewajarnya memanggil perayu pertama hingga kelima untuk membela diri bagi kesalahan membunuh yang dihukum di bawah s 302 Kanun Keseksaan dan kesalahan bersubahat untuk membunuh di bawah s 109 dibaca bersama s 302 Kanun yang sama terhadap perayu Abdoul Hakeem.



[105] Selanjutnya, di peringkat pembelaan pula, pihak pembelaan telah memanggil Dr Rohayu (SD19), iaitu seorang pakar dan Ketua Jabatan, Jabatan Perubatan Forensik, Hospital Sungai Buloh, untuk memberikan keterangan. Secara asasnya, SD19 mempertikaikan dapatan SP6 dan berpendapat sebab kematian Si Mati ialah jangkitan paru-paru. SD19 juga telah memberikan alasan mengapa pendapatnya itu bertentangan dengan pendapat SP6.

[106] Mahkamah ini mendapati, dengan keterangan SP6 yang tercabar semasa diperiksa balas dan dengan adanya keterangan SD19 yang mempertikaikan keterangan SP6, pihak pendakwaan juga telah gagal membuktikan s 300(c) Kanun Keseksaan melampaui keraguan yang munasabah.

Kesalahan Di Bawah Seksyen 304(a) Kanun Keseksaan

[107] Seksyen 304(a) Kanun Keseksaan memperuntukkan:

304. Barang siapa melakukan kesalahan **mematikan orang dengan salah yang tidak terjumlah kepada kesalahan membunuh orang** hendaklah dihukum-

- (a) dengan penjara yang boleh sampai tiga puluh tahun dan bolehlah juga dikenakan denda, jika perbuatan yang menyebabkan kematian itu dilakukan dengan niat hendak menyebabkan kematian, atau **hendak menyebabkan sesuatu bencana tubuh yang mungkin menyebabkan kematian;**

[Penekanan Diberikan]

[108] Inti pati bagi kesalahan di bawah s 304(a) Kanun keseksaan ini adalah jelas, iaitu berlakunya suatu kematian terhadap seseorang, kematian tersebut disebabkan oleh tertuduh dan tertuduh berniat menyebabkan kecederaan terhadap Si Mati yang mungkin menyebabkan kematian. (Lihat *Tham Kai Yau & Ors v. PP* [1976] 1 MLRA 279; *Vaeyapuri v. PP* [1965] 1 MLRA 143; *Shanmugam Munusamy v. PP* [1998] 2 MLRA 344).

[109] Berdasarkan keterangan seperti yang diuraikan terdahulu, ketiga-tiga inti pati bagi kesalahan mematikan orang dengan salah yang tidak terjumlah kepada kesalahan membunuh orang di bawah s 304(a) Kanun Keseksaan telah dibuktikan oleh pihak pendakwaan melampaui keraguan yang munasabah. Seperti yang diuraikan terdahulu keterangan yang dikemukakan di Mahkamah membuktikan kematian Si Mati, niat perayu pertama hingga perayu kelima menyebabkan kecederaan pada Si Mati dan kecederaan berkenaan mungkin menyebabkan kematian pada Si Mati.

Kesalahan Bersubahat

[110] Kesalahan bersubahat ini berlaku apabila seseorang itu menghasut melakukan kesalahan jenayah, mengambil bahagian dalam pakat jahat untuk melakukan kesalahan tersebut atau dengan sengaja membantu dalam kesalahan berkenaan. Ini dinyatakan di bawah peruntukan s 107 Kanun Keseksaan seperti yang berikut:



107. **Seseorang adalah bersubahat** melakukan sesuatu perkara jika ia-

- (a) **menghasut** mana-mana orang supaya melakukan perkara itu;
 - (aa) mengarahkan mana-mana orang supaya melakukan perkara itu;
- (b) **mengambil bahagian** bersama dengan seorang atau beberapa orang lain **dalam** apa-apa **pakat jahat** bagi melakukan perkara itu, jika suatu perbuatan atau suatu ketinggalan yang menyalahi undang-undang berlaku ketika pada menurut pakat jahat itu, dan dengan tujuan hendak melakukan perkara itu; atau
- (c) **dengan sengaja membantu** melakukan perkara itu dengan apa-apa perbuatan atau apa-apa ketinggalan yang menyalahi undang-undang.

[Penekanan Diberikan]

(Lihat *PP v. Datuk Haji Harun Haji Idris & Ors* [1977] 1 MLRH 438 dan *Datuk Haji Harun Haji Idris & Ors v. PP* [1977] 1 MLRA 223)

[111] Seterusnya, s 109 Kanun Keseksaaan memperuntukkan:

109. Barang siapa menyubahati sesuatu kesalahan hendaklah jika perbuatan yang disubahati itu dilakukan oleh sebab subahat itu, dan tiada peruntukan yang nyata dibuat oleh Kanun ini berkenaan dengan seksaan bagi subahat itu, **dihukum dengan hukuman yang diperuntukkan bagi kesalahan itu.**

[Penekanan Diberikan]

[112] Dalam buku Ratanlal & Dhirajlal, *The Indian Penal Code*, di ms 549, persubahatan melalui hasutan ini dijelaskan seperti berikut:

“A person is said to ‘instigate’ another to an act when he **actively suggests** or **stimulates him** to the act by any means of language, direct or indirect, whether it takes the form of express solicitation, or of hints, insinuation or encouragement.”

...

“The word ‘instigate’ means **to goad or urge forward or to provoke, incite, urge or encourage to do an act.**”

[Penekanan Diberikan]

[113] Kembali semula kepada kes terhadap perayu Abdoul Hakeem, keterangan saksi-saksi pendakwaan terutamanya saksi mata SP24 jelas menyatakan bahawa perayu ini telah memberikan arahan kepada perayu-perayu lain untuk menangkap seterika wap pada badan Si Mati di hari kejadian. Ini jelas termasuk dalam perbuatan menghasut (instigate) untuk melakukan kesalahan jenayah. Justeru itu, kesalahan persubahatan terhadap perayu Abdoul Hakeem ini telah dibuktikan oleh pihak pendakwaan melampaui keraguan yang munasabah.



[114] Seterusnya dalam pertuduhan yang dikemukakan terhadap perayu, ada dinyatakan bahawa perayu bersubahat untuk melakukan kesalahan dalam pertuduhan iaitu kesalahan di bawah s 109 Kanun Keseksaan. Maksud bersubahat juga diperincikan di bawah s 107 Kanun yang sama yang merangkumi perbuatan menghasut, pakat jahat dan dengan sengaja membantu. Ini merupakan perincian kesalahan bersubahat dan tidak perlu dinyatakan dalam pertuduhan. Perincian atau perbuatan yang mana satu antara perbuatan-perbuatan persubahatan tersebut boleh dibuktikan melalui keterangan di Mahkamah. Tambahan pula, perayu tidak terkeliru apabila mengemukakan pembelaannya yang telah menafikan ada mengarahkan perayu-perayu lain menangkap seterika wap pada Si Mati. Jika adapun sebarang ketinggalan dalam pertuduhan terhadap perayu, yang tidak berlaku dalam kes ini, ketinggalan itu tidaklah material kerana perayu dengan jelas tidak terkeliru. Ini selaras dengan peruntukan s 156 Kanun Tatacara Jenayah yang menyebut:

“156. Kesilapan dalam menyatakan, sama ada kesalahan atau butir-butir yang dikehendaki disebutkan dalam pertuduhan itu, dan ketinggalan daripada memperihalkan kesalahan atau butir-butir itu **tidak boleh dianggap pada mana-mana peringkat kes itu, sebagai material, kecuali tertuduh itu sebenarnya telah terkeliru** oleh sebab kesilapan atau ketinggalan itu.”

[Penekanan Diberikan]

Isu-Isu Lain Yang Dibangkitkan Oleh Pihak Pembelaan

Niat Bersama Di Bawah Seksyen 34 Kanun Keseksaan

[115] Bagi memudahkan pemahaman, s 34 menyatakan:

34. Apabila suatu perbuatan jenayah dilakukan oleh beberapa orang bagi mencapai **niat bersama mereka** semuanya, **tiap-tiap seorang daripada mereka itu adalah bertanggung atas perbuatan itu sama seperti seolah-olah perbuatan itu telah dilakukan olehnya seorang.**

[Penekanan Diberikan]

[116] Isu berhubung niat bersama di bawah s 34 Kanun Keseksaan ini telah banyak dijelaskan oleh Mahkamah Tertinggi negara ini dan antaranya dalam kes *PP v. Azilah Hadri & Anor* [2015] 1 MLRA 431 yang menyatakan di perenggan-perenggan [98] dan [99] seperti yang berikut:

“[98] Section 34 of the Penal Code provides that when a criminal act is done by several persons, in furtherance of the common intention of all, each of such persons is liable for that act in the same manner as if the act was done by him alone.

The Supreme Court in *Namasiyam Doraisamy v. PP & Other Cases* [1987] 1 MLRA 73, at p 84, observed that:

In law, common intention requires a prior meeting of the minds and presupposes some prior concert. Proof of holding the same intention or



of sharing some other intention, is not enough. There must be proved either by direct or by circumstantial evidence that there was (a) a common intention to commit the very offence of which the accused persons are sought to be convicted and (b) participation in the commission of the intended offence in furtherance of that common intention.

Where the prosecution case rests on circumstantial evidence, the circumstances which are proved must be such as necessarily lead only to that inference. Direct evidence of a prior plan to commit an offence is not necessary in every case because common intention may develop on the spot and without any long interval of time between it and the doing of the act commonly intended. In such a case, common intention may be inferred from the facts and circumstances of the case and the conduct of the accused. (The Supreme Court (of India) on *Criminal Law* 1950-1960 by J.K. Soonavala pp 188 to 193).

[99] It is trite that when s 34 of the Penal Code is alluded to in a charge for murder, there is no requirement to prove who actually or ultimately caused the death of the deceased (*Ong Chee Hoe v. PP* [1999] 4 SLR 688). In that case the court opined:

In any case, the effect of invoking s 34 made it unnecessary to determine who exactly the actual doer of the offence in question was. In the Privy Council decision of *Barendra Kumar Ghosh v. Emperor* AIR [1925] PC 1, the court stated:

Section 34 deals with the doing of separate acts, similar or diverse, by several persons; but if all are done in furtherance of a common intention, each person is liable for the result of them all, as if he had done them himself”.

(Lihat juga *Farose Tamure Mohamad Khan v. PP & Other Appeals* [2016] 6 MLRA 337; *Pathmanabhan Nalliannan v. PP & Other Appeals* [2016] 1 MLRA 126; *Low Kian Boon & Anor v. PP* [2010] 1 MLRA 418; *Namasiviam & Ors v. PP* [1987] 1 MLRA 73; dan *Lee Fah Sang v. PP* [1967] 1 MLRA 459).

[117] Niat bersama di bawah s 34 ini boleh dibuktikan berdasarkan inferens daripada fakta dan keadaan sesuatu kes itu. Prinsip atau konsep atau perundangan ini bersandarkan penglibatan bersama dalam melakukan kesalahan tersebut dan tidak perlu dibuktikan siapa antara tertuduh-tertuduh yang sebenarnya menyebabkan kesalahan yang mereka dituduh. Di samping itu, niat bersama ini boleh wujud pada masa kejadian itu sendiri.

[118] Dalam kes ini semua perayu berada di tempat kejadian di bilik 4-10 pada 22 Mei 2017 dan dibuktikan bahawa perayu pertama hingga perayu kelima telah menangkap seterika wap pada Si Mati. Hanya satu seterika sahaja yang digunakan. Jumlah tekapan seterika tersebut oleh setiap perayu adalah tidak relevan kerana satu tekapan seterika pada Si Mati pun dengan niat bersama adalah mencukupi untuk pemakaian s 34 Kanun Keseksaan ini. Perayu-perayu juga ditunjukkan telah mengawal Si Mati selepas kejadian dan berpakat untuk tidak membawa Si Mati ke hospital untuk rawatan. Penglibatan mereka tidak



dapat dipertikaikan. Perayu Abdoul Hakeem pula dibuktikan telah memberikan arahan untuk perayu-perayu berkenaan untuk menangkap seterika wap pada Si Mati. Daripada fakta dan keadaan kes ini, inferens yang munasabah ialah kesemua perayu mempunyai niat bersama untuk mendapatkan pengakuan Si Mati yang dikatakan mencuri komputer riba perayu pertama dengan mencederakan Si Mati dengan seterika wap yang ditekup pada badan Si Mati dan akhirnya membawa kepada kematian Si Mati. Sehubungan itu, elemen niat bersama ini telah dibuktikan oleh pihak pendakwaan.

Kegagalan Mematuhi Peruntukan Seksyen 182A Kanun Tatacara Jenayah Apabila Hakim Bicara Gagal Mempertimbangkan Keterangan Muhammad Alif Farhan Bin Aerosni (SD20) Yang Memihak Kepada Perayu Ketiga Dan Keterangan SP25 Yang Memihak Kepada Perayu Kelima

[119] Seksyen 182A(1) Kanun Tatacara Jenayah menyatakan;

182A. (1) Pada akhir perbicaraan, **Mahkamah hendaklah menimbangkan segala keterangan yang dikemukakan di hadapannya** dan hendaklah memutuskan sama ada pihak pendakwaan telah membuktikan kesnya tanpa keraguan yang munasabah.

[Penekanan Diberikan]

[120] Peguam perayu ketiga berhujah bahawa Hakim Bicara tidak menimbangkan keterangan SD20 yang dikatakan memihak kepada perayu ketiga. Dihujahkan lagi bahawa jika keterangan SD20 diambil kira, keterangan itu dapat menyanggah keterangan SP24 dan SP25.

[121] Berkaitan hujahan ini, Hakim Bicara ada mengariskan keterangan SD20 dalam alasan penghakimannya, ini dapat dilihat di perenggan [725] hingga perenggan [736] alasan penghakiman tersebut. Ini sendiri dapat menunjukkan bahawa Hakim Bicara memberikan perhatian kepada keterangan SD20 dalam penghakimannya. Hakim Bicara juga dalam perenggan-perenggan yang dinyatakan berkenaan telah memperincikan peranan dan penglibatan SD20. Hakim Bicara juga telah menyatakan di perenggan [730], alasan penghakimannya, antara lain bahawa SD20 belajar dan tidur di bilik 4-11 dan hanya kembali ke bilik 4-10 pada pukul 6:30 pagi pada tarikh 22 Mei 2017 tersebut. Di sini, berdasarkan pertuduhan, kejadian menangkap seterika wap pada Si Mati adalah antara pukul 4.45 pagi hingga 5.45 pagi. Sehubungan itu, dalam tempoh tersebut, SD20 tiada di tempat kejadian. Tiada sebarang keterangan daripada SD20 yang dikatakan boleh menyanggah keterangan SP24 dan SP25 yang berada di tempat kejadian. Tambahan pula, Hakim Bicara seperti dinyatakan terdahulu, telah membuat dapatan fakta bahawa SP24 dan SP25 ialah saksi-saksi yang boleh dipercayai.

[122] Peguam perayu kelima pula berhujah bahawa Hakim Bicara gagal mengambil kira keterangan SP25 bahawa perayu kelima diarahkan mencucuh seterika wap pada Si Mati apabila perayu kelima hendak keluar dari bilik 4-10 berkenaan dan perayu kelima hanya menangkap seterika wap pada Si Mati sekali sahaja.



[123] Keterangan SP25 ini, pada hemat kami, tidak membantu pembelaan perayu kelima kerana keterangan tersebut membuktikan perayu kelima ada menangkap seterika wap pada Si Mati pada tarikh dan masa kejadian. Seperti yang dihuraikan terdahulu berhubung pemakaian s 34 Kanun Keseksaan, tekapan seterika wap pada Si Mati, walaupun sekali, tidak dapat melepaskan perayu kelima daripada kesalahan yang dihadapi dalam kes ini.

[124] Sehubungan itu, tiada ketidakpatuhan peruntukan s 182A(1) Kanun Keseksaan oleh Hakim Bicara dalam kes ini.

Kegagalan Memanggil Mejar Zarizal Untuk Memberikan Keterangan Atau Ditawarkan Kepada Pihak Pembelaan Telah Menyebabkan Anggapan Yang Bertentangan Terhadap Kes Pendakwaan Di Bawah Seksyen 114(g) Akta Keterangan 1950

[125] Seksyen 114(g) menyebut:

“114. Mahkamah boleh menganggap kewujudan apa-apa fakta yang difikirkannya mungkin telah berlaku, setelah mengambil perhatian akan perjalanan biasa kejadian semula jadi, kelakuan manusia, dan urusan awam dan persendirian, dalam hubungannya dengan fakta kes yang tertentu itu.

MISALAN Mahkamah boleh menganggap—

(g) bahawa keterangan yang boleh dikemukakan tetapi tidak dikemukakan. Jika dikemukakan, tidak akan memberi faedah kepada orang yang enggan mengemukakannya.”

[Penekanan Diberikan]

[126] Undang-undang mantap adalah jelas bahawa peruntukan s 114(g) terpakai jika terdapat kegagalan mengemukakan dokumen atau saksi yang material dalam sesuatu kes tersebut. Lebih-lebih lagi jika kegagalan memanggil saksi-saksi ini menyebabkan kelompangan kepada kes pendakwaan atau amat memprejudis kes pembelaan.

[127] Dalam kes yang sering dirujuk berhubung isu ini, iaitu *Munusamy Vengadasalam v. PP* [1986] 1 MLRA 292, Mahkamah Agung ketika itu menjelaskan:

“It is essential to appreciate the scope of s 114(g) of the Evidence Act, 1950, lest it be carried too far outside its limit. Adverse inference under that illustration can only be drawn if there is withholding or suppression of evidence and not merely on account of failure to obtain evidence. It may be drawn from withholding nor just any document, but a material document by a party in his possession, nor for non-production of not Just any witness but only an important and material witness to the case.”

[Penekanan Diberikan]



(Lihat juga *PP v. Mansor Md Rashid & Anor* [1996] 2 MLRA 35; *Muharam Anson v. PP* [1980] 1 MLRA 120; *Ti Chuee Hiang v. PP* [1995] 1 MLRA 354; *Namasiyam & Ors v. PP* [1987] 1 MLRA 73; dan *Seneviratne v. R* [1936] 3 All ER 36)

[128] Peguam perayu ketiga dalam kes ini berhujah bahawa tindakan Mejar Zarizal memberikan amaran kepada SP24 supaya tidak memberikan keterangan yang memihak kepada perayu adalah material dan dapat mencabar kebolehpercayaan keterangan SP24 di Mahkamah. Justeru itu, kegagalan pihak pendakwaan memanggil Mejar Zarizal untuk memberikan keterangan atau menawarkan saksi itu kepada pihak pembelaan, menimbulkan anggapan yang bertentangan terhadap kes pendakwaan di bawah s 114(g) Akta Keterangan 1950.

[129] Berhubung isu ini, keterangan SP24 hendaklah dilihat secara keseluruhannya. Semasa diperiksa balas oleh peguam, SP24 telah menjelaskan bahawa Mejar Zarizal ada memberikan nasihat dan menafikan keterangan SP24 di Mahkamah adalah tidak benar. SP24 juga telah mengesahkan bahawa keterangannya di Mahkamah adalah sama dengan kenyataan percakapannya kepada pihak polis. Seterusnya SP24 menafikan bahawa kenyataan yang diberikan kepada pihak polis adalah rekaan SP24.

[130] Berdasarkan keterangan SP24 di Mahkamah, kami tidak nampak bagaimana keterangan Mejar Zarizal adalah material dalam kes ini. Tiada kelompangan tercipta pada kes pendakwaan tanpa keterangan Mejar Zarizal itu dan segala cabaran berhubung kebenaran keterangan SP24 telah pun dijawab oleh SP24 sendiri semasa diperiksa balas oleh peguam.

[131] Justeru itu juga, hujahan peguam bahawa peruntukan s 114(g) terpakai dalam kes ini dengan jelas tidak bermerit.

Kekhilafan Mahkamah Rayuan Yang Menyatakan Dalam Alasan Penghakimannya Bahawa Perayu Ketiga Ada Mengaku Menekap Seterika Pada Si Mati

[132] Pihak pendakwaan dalam isu ini tidak menafikan bahawa Mahkamah Rayuan terkhilaf apabila menyatakan perayu ketiga mengaku ada menangkap Si Mati dengan seterika wap. Meskipun begitu, pembuktian kes terhadap perayu-perayu termasuk perayu ketiga tidak bersandarkan pada pengakuan perayu-perayu. Dalam kes ini, SP24 ialah saksi mata yang melihat sendiri perayu ketiga menangkap seterika wap pada Si Mati semasa hari kejadian. Pembuktian yang tidak mengambil kira kepada mana-mana pengakuan yang seterusnya membawa kepada sabitan perayu-perayu termasuk perayu ketiga, tidak membawa kepada ketidakadilan kepada perayu-perayu. Apa yang penting di sini adalah terdapatnya keterangan melampaui keraguan yang munasabah di Mahkamah untuk mensabitkan perayu-perayu atas kesalahan yang mereka hadapi.



[133] Sehubungan itu juga isu yang dibangkitkan oleh peguam ini tidak bermerit.

Isu “Steven Johnson Syndrome”

[134] Peguam kepada perayu Abdoul Hakeem juga ada membangkitkan isu ini dengan hujah bahawa Si Mati mengalami alahan atau Steven Johnson Syndrome daripada ubatan yang diberikan oleh Dr Azfar (SP7) dan salah satu daripada kesan Syndrome ini adalah kesan bakar pada badan. Alahan ini juga diujahkan boleh menjadi punca kematian Si Mati.

[135] Walau bagaimanapun, semasa diperiksa semula, SP7 telah menjelaskan bahawa hasil pemeriksaan SP7 terhadap Si Mati tidak menunjukkan bahawa Si Mati mengalami apa-apa alahan. Seterusnya, SP7 menafikan alahan ubat telah menyebabkan kematian Si Mati dan Si Mati juga tidak mengalami tanda-tanda Steven Johnson Syndrome.

[136] Sehubungan itu, berdasarkan keterangan SP7, isu Steven Johnson Syndrome ini tidak dapat membantu pembelaan perayu-perayu dan tidak bermerit.

Isu Berkaitan Pembelaan Perayu-Perayu

[137] Perayu pertama, perayu kedua dan perayu ketiga dalam pembelaan mereka, membuat penafian ada menangkap seterika wap pada badan Si Mati pada hari kejadian. Perayu Abdoul Hakeem pula menafikan ada memberikan arahan kepada perayu-perayu untuk menangkap seterika wap pada badan Si Mati.

[138] Berhubung isu penafian dalam pembelaan kes ini, undang-undang adalah jelas bahawa penafian semata-mata tanpa sebarang keterangan lain yang boleh disandarkan oleh Mahkamah tidak dapat mencabar kes pendakwaan. Dalam kata lain, bagi menimbulkan sesuatu keraguan yang munasabah terhadap kes pendakwaan, pihak pembelaan tidak boleh bergantung hanya pada penafian semata-mata. (Lihat *D.A. Duncan v. PP* [1980] 1 MLRA 55 dan *PP v. Ling Tee Huah* [1980] 1 MLRH 593).

[139] Pembelaan yang baik dan dapat menimbulkan keraguan yang munasabah terhadap kes pendakwaan antaranya ialah pembelaan yang dapat menjawab keterangan yang dikemukakan oleh pihak pendakwaan. (Lihat *Krishna Rao Gurumurthi v. PP and Another Appeal* [2009] 1 MLRA 23 dan *Amathevelli P Ramasamy v. PP* [2009] 1 MLRA 153).

[140] Dalam kes ini juga, perayu pertama hingga perayu ketiga, selain daripada menafikan ada menangkap seterika wap pada badan Si Mati menyatakan dalam keterangan mereka bahawa pelajar Mubin Mustaza yang sebenarnya menangkap seterika wap pada Si Mati pada hari kejadian. Walau bagaimanapun, perkara ini tidak disarankan kepada saksi-saksi pendakwaan di peringkat pendakwaan kes, terutama saksi mata SP24 dan SP25. Malahan semasa pemeriksaan-balas



SP25, dia mengesahkan tidak nampak Mubin melakukan apa-apa kepada Si Mati pada malam kedua, iaitu pada 22 Mei 2017 tersebut. Seterusnya, perayu keempat sendiri dalam pembelaannya, menyatakan bahawa perayu pertama dan kedua ada menangkap seterika wap pada badan Si Mati pada hari kejadian.

[141] Kegagalan pihak pembelaan menyarankan perkara ini kepada saksi-saksi pendakwaan, membolehkan suatu kesimpulan dibuat bahawa pembelaan tersebut merupakan sesuatu pembelaan fikir semula (afterthought). (Lihat *Tan Kim Ho & Anor v. PP* [2009] 5 MLRA 612 dan *Megat Halim Megat Omar v. PP* [2008] 2 MLRA 489).

[142] Sehubungan itu, Mahkamah ini bersetuju dengan dapatan Mahkamah sebelum ini bahawa perayu-perayu telah gagal menimbulkan keraguan yang munasabah terhadap kes pendakwaan dan dalam konteks ini, bagi kesalahan di bawah s 304(a) terhadap perayu pertama hingga perayu kelima dan kesalahan persubahatan di bawah s 109 Kanun Keseksaan bagi kesalahan s 304(a) tersebut terhadap perayu Abdoul Hakeem.

[143] Pembelaan perayu keempat yang mengaku ada menangkap seterika wap pada badan Si Mati sebanyak 2 kali dan perayu kelima yang mengaku ada menangkap seterika wap pada badan Si Mati hanya sekali telah dihuraikan sebelum ini antaranya, dengan pemakaian niat bersama di bawah s 34 Kanun Keseksaan, bilangan tekapan seterika wap pada Si Mati oleh setiap perayu adalah tidak relevan bagi suatu sabitan terhadap perayu pertama hingga perayu kelima.

Kesimpulan

[144] Berdasarkan huraian di atas, sabitan perayu pertama hingga kelima bagi kesalahan membunuh yang dihukum di bawah s 302 Kanun Keseksaan dan kesalahan persubahatan membunuh terhadap perayu Abdoul Hakeem di bawah s 109 Kanun Keseksaan dan dibaca bersama s 302 Kanun yang sama tidak dapat dipertahankan. Sehubungan itu, keputusan Mahkamah Rayuan yang mensabitkan perayu-perayu bagi kesalahan tersebut adalah diketepikan.

[145] Walau bagaimanapun, keterangan yang dikemukakan di Mahkamah mencukupi melampaui keraguan yang munasabah untuk sabitan bagi kesalahan mematikan orang dengan salah yang tidak terjumlah kepada kesalahan membunuh orang di bawah s 304(a) Kanun Keseksaan. Justeru itu, keputusan Mahkamah Tinggi yang mensabitkan perayu pertama hingga kelima bagi kesalahan di bawah s 304(a) Kanun Keseksaan dan mensabitkan perayu Abdoul Hakeem bagi kesalahan bersubahat di bawah s 109 dibaca bersama s 304(a) dengan ini dikembalikan. Hukuman terhadap perayu-perayu yang dijatuhkan oleh Hakim Mahkamah Tinggi juga dikekalkan iaitu penjara 18 tahun dari tarikh tangkap.

